

O LE OLAGA FA'APA'IAINA

Tusia e

Elena G Uaita

O lenei tusi ua Fa'a-Samoaina

O LE OLAGA FA'APA'IAINA

Tusia e Elena G Uaita

"Ia ato'atoa ona fa'apa'iaina o outou e le Atua lava e Ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso" (I Tesalonia 5:23).

Copyright, 1937, 1965 a le
Ellen G White Estate, Incorporated

Lolomiina muamua i lalo o le igoa,
"Fa'apa'iaina Fa'ale-Tusi Pa'ia"

'Upu mo le Faitau Tusi

O nei tusiga sa i lalo o le igoa lautele "O le Fa'apa'iāga" mai fa'asologa o matā'upu na tusia e le tama'ita'i o Elena Uaita ma sa lomina i le pepa fa'asalalau a le ekalesia o le *Review and Herald* i le tausaga e 1881. Na tusia e ia mai le loloto o mea na fa'aalia e le Atua iā te ia , mai se mafaufau ma le loto ua fa'amalamalamaina e ala i le Agaga Pa'ia, na ia iloilo ma su'esu'e fa'avae e mana'omia pe a ua fa'apa'iaina moni ma lona 'ese'esega mai isi uma matā'upu e lē talafeagai, e ui ina lauiloa ia mea.

I ia lava tausaga sa tu'ufata'atasia ai ia matā'upu ma lolomiina i se tusi sa ta'ua o le "*Fa'apa'iāga Fa'ale-Tusi Pa'ia*" ma na sau ai i tua iā Ianuāri 1889, Numera Muamua.

I le tausaga e 1937 na toe lomina ai nei matā'upu uma i lalo o le fa'auluga ma le igoa "*O le Olaga Fa'apa'iaina*" ma sa fa'aopoopoina i ai sina vaega e tasi mai le tusi o *Perofeta ma Tupu*," o lea o lo'o aofia ai i lenei lomiga mo nei ona pō. E afe ma afe ua agaga ua fa'amanuiaina ma o lo'o fa'aauau pea mo i latou o lo'o faitau i lenei tusi itiiti lava ma le fe'au tāua o lo'o tu'u mai ai.

Ua fou le fa'atulagaina, peita'i e leai se suiga o 'upu ma matā'upu, a e na toe lomina lenei tusi e matuā loloto le fa'aleagaga ina ia atili fa'alauteleina ona tufatufa atu ma o'o ai i vaega uma o le lalolagi.

O le lomiga fou lenei ina ua toe fa'atonutonuina o lo'o aofia ai i tusiga a Misi Uaita ma e maua i fa'asologa tusi a le ekalesia e ta'ua o le *Seventh-day Adventist Bible Commentary*.

Trustees a Ellen G White Publications
July, 1956

E Uiga i le Tusi ua Fa'a-Samoaina

O lenei tusi ua fa'aliliuina i le gagana Samoa ma le fa'amoemoe ia fa'alauteleina ai le malamalama a i latou uma e faitau ai i lenei lomiga. Ma o le fa'anaunauga ia atili fa'amalosia ai le su'esu'eina o le Afioga a le Atua, atonu o le a manino lelei ai i le Kerisiano moni le uiga o le olaga ua fa'apa'iaina.

E afe ma afe agaga ua fa'amanuiaina mai le faitauina o lenei tusi talu ona muā'i lomina i le tausaga e 1937. Sa fa'aliliuina ma fa'atonutonu lenei fe'au tāua e Abbie L. Watt ma Florence L. Voigt i le tausaga e 2022 ona sa fa'aaogāina e fa'avae ai matā'upu o su'esu'ega fa'ale-Tusi Pa'ia i le "*Olaga Fa'apa'iaina*" a le tagata Kerisiano.

Ia 'avea lenei tusi o se ta'iala mo le Kerisiano a o fa'aauau pea le aga'i i luma o lana savaliga ona o lona olaga ua fa'apa'iaina.

Ma le Fa'aaloalo Tele,
Fa'atonu Fa'a-Samoa

Fa'asino Matā'upu

<u>Matā'upu</u>	<u>Itūlau</u>
1. O le Fa'apa'iāga Moni	1
2. O le Fa'aa'oa'o a Tanielu	5
3. O le Pulea o Mana'oga ma Tu'inanau	8
4. O le Ogāumu 'A'asa	12
5. O Tanielu i le Lua o Leona	15
6. O Tatalo a Tanielu	17
7. O le Amio a Ioane	20
8. O le Soifuāga ma le Galuega a Ioane	23
9. O Ioane ua Fa'a'aunu'ua	26
10. O le Amio a le Kerisiano	30
11. O le Fa'apa'iāga - Avanoa Fa'apitoa a le Kerisiano	34

O le ā le Fa'apa'iāga Moni

Matā'upu 1

O le fa'apa'iāga (fa'amāmā po o le fa'apa'iaina) ua tu'u mai i le Afioga Pa'ia e fa'atatau lava lea i le tagata atoa - o le agaga, mafaufau, ma le tino. O le manatu moni lenei o le fa'apa'iāga ato'atoa. Na tatalo Paulo mo le ekalesia i Tesalonia ina ia mafai ona latou 'oli'oli ona o lenei fa'amanuiāga tele. "Ia ato'atoa ona fa'apa'iaina o outou e le Atua lava e ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso" (I Tesalonia 5:23).

E i ai i le lalolagi o talitonuga se manatu e uiga i le fa'apa'iāga e sesē ma e faigatā lona a'afiāga. O le to'atele o i latou e ta'u mai ua fa'apa'iaina e lē iā i latou le mea moni, ona o lea fa'apa'iāga e na o 'upu ma tapua'iga e loto i ai. O i latou uma e sa'ili ma le fa'amaoni le amio Kerisiano e ato'atoa, o le a lē manatu o latou e lē agasala. Atonu o latou olaga e agatonu, atonu o lo'o ola latou i se olaga e fa'aali atu ai le 'upu moni ua latou talia. Peita'i o le tele o le pulea o latou mafaufau e tumau ai i uiga moni o Keriso, ma o le latalata atu fo'i o i latou i Lona fa'atusa, o le a atili manino ai ona latou malamalama i lona mamā ato'atoa, ma o le a atili lagona ai e i latou lo latou lava tulaga lē ato'atoa.

Pe a ta'u mai e le tagata o ia ua fa'apa'iaina, ua tu'u mai ai lava le fa'amaoniga o ia o lo'o mamao mai le fa'apa'iāga. Ua lē mafai ona ia iloa lona vaivaiga ma mea o lo'o ia mana'omia. Ua va'ai ia iā te ia ma fa'apea ifo o ia o le fa'ata o le fa'atusa o Keriso, ona e na te lē o iloa lelei o Ia. O le tele o le mamao o le vā ma le Fa'aola, o le sili a'e fo'i lea o le tulaga fa'afiaamiotonu i lana lava va'ai.

Pe a ua tatou salamō (ona o agasala) ma fa'amaulalo a o tatou mafaufau loloto iā Iesu, o Lē na tuia ona o a tatou agasala ma na tau'aveina a tatou fa'anoanoāga, atonu o le a mafai loa ona tatou savavali i Ōna tulaga 'a'ao. Pe a tatou va'ai iā te Ia o le a suia ai i tatou e fa'apei o Ia. Ma a faia lenei galuega iā i tatou, o le a lē fa'aילוaina mai so tatou lava amiotonu, peita'i o le a fa'aeaina Iesu Keriso a e fa'apipi'i atu o tatou agaga lēaogā i Ōna uiga e tonu ma lelei.

Ta'usalaina le Fa'afiaamiotonu

E ta'usalaina e lo tatou Fa'aola le fa'afiaamiotonu. Na Ia a'oa'o Ōna so'o ia iloa o le itu'aiga talitonuga e sili e fa'aali manino mai ai e filemū ma e uiga fa'amaulalo. Na Ia lapata'i atu ia faia filemū a latou galuega lelei mo isi; ia lē faia ia fa'alialia, e lē ina ia vi'ia pe fa'aaloaloina ai e tagata, a e faia ia fa'amamaluina ai le Atua, ma ia tauia i latou i se taimi mulimuli. Pe a faia galuega lelei ina ia vi'ia ai e tagata, o le a leai se tau mo i latou mai le Tamā i le lagi.

Sa a'oa'oina so'o o Keriso ia 'a'ua ne'i tatalo ina ia lagona mai e tagata. "A o 'oe, pe a e tatalo, inā ulu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo'i o Lē silasila i le mea lilo, na te avatu fa'aaliali se tau iā te 'oe" (Mataio 6:6). O nei fetalaiga a Keriso na fa'aילוa ai e Na te le'i talia ia itu'aiga amio fa'afiaamiotonu sa ta'atele i le 'au Faresaio. O Āna a'oa'oga i luga o le mauga na fa'aילוa mai ai o galuega e faia ma le alofa e fa'atinoina ai uiga lelei ma tapua'iga fa'aleagaga e fa'aalia ai le manogi pe a faia ma le agaga fa'amaoni, i le salamō ma le loto maulalo. O le uiga mamā e fa'apa'iaina ai le gaoioiga.

O le fa'apa'iāga moni o le tausisi atoa lea i le finagalo o le Atua. O le a to'ilalo ai manatu ma lagona fouvale, o le a fafaguina e le si'ufofoga o Iesu le ola fou ma e afāina ai le tagata atoa. O i latou ua fa'apa'iaina moni o le a lē fa'atāuaina o latou lava manatu ia fai ma tapula'a e iloa ai le sa'o ma le sesē. Latou te lē fa'aילוa tagata pe fa'afiaamiotonu; peita'i e lē manatu iā i latou lava ina ne'i lē fa'ataunu'uina ni folafolaga na faia iā i latou ma lē 'ausia tulaga na fa'avae ai ia folafolaga.

Suia le Manatu Fa'avae e le Lagona

O le to'atele o lo'o ta'u mai ua fa'apa'iaina e matuā lē iloa lava le galuega a le alofa tunoa i totonu o le loto. Pe a tofotofoina ma fa'amaonia, o i latou lava e pei o Faresaio fa'afiaamionu. E leai so latou 'ese'esega. Latou te tu'u'ese manatu sa'o ma le fa'autauta a e fa'alagolago na o latou lagona, ma ta'u mai ai sa lagona le fa'apa'iaina i se taimi. O i latou ia e loto ma'a'a ma e fa'ailoa mai pea lo latou tulaga pa'ia i 'upu e tele, a e leai se fa'amaoniga i ni fua lelei e maua. O i latou uma o lo'o ta'u mai pea ua fa'apa'iaina o lo'o fa'auisesē o latou lava agaga ma avatu a'oa'oga e ta'ita'i 'ese ai le to'atele o lo'o naunau fa'amaoni e usiusita'i i le finagalo o le Atua. O ē o lo'o feso'ota'i pea ma i latou atonu o le a fa'alogoina ai 'upu, "E ta'ita'i a'u e le Atua! E a'oa'o a'u e le Atua! O lo'o ola a'u e leai se agasala!" O le to'atele o i latou e feso'ota'i ma lenei agaga o lo'o fetaia'i ma se mea e pouliuli ma e fa'alilolilo, a e latou te lē mafai ona malamalama i ai. O lenei mea e lē fa'apei o Keriso, e na o Ia le fa'ata'ita'i moni.

O le fa'apa'iāga fa'ale-Tusi Pa'ia e lē fa'atatauina i ni lagona malosi ona ua faia lea ma tapula'a a e ua ta'ita'iina ai le to'atele i le sesē. Pe a ua lagona le fiafia pe ua fa'amalieina le loto, ona latou fa'apea ai lea ua fa'apa'iaina i latou. O le lagona o le fiafia po o le lē fiafia e lē o se fa'amaoniga pe ua fa'apa'iaina pe o le lē fa'apa'iaina, ma o le fa'apa'iāga e lē o se tulaga e maua fa'afuase'i. O le fa'apa'iāga moni o se galuega o aso ta'itasi, e fa'auau pea i le olaga atoa o le tagata. O i latou o lo'o fa'afeagai ma fa'aosoosoga i aso ta'itasi, o lo'o tau fa'ato'ilalo uiga agasala, ma o lo'o sa'ili pea mo le fa'apa'iaina o loto ma olaga, e leai ni manatu fa'avi'ivi'i e ta'u atu ai se tulaga ua fa'apa'iaina. O i latou o lo'o fia 'a'ai ma fia inu mo le amiotonu; ma o le agasala o le a foliga iā i latou e matuā leaga lava.

E i ai ē ta'u mai le fa'apa'iāga ma e ta'utino e iā i latou le 'upu moni, a e atonu e latou te lē o iloa le 'ese'esega. O le molimau a i latou e fai mai fa'apea o le a 'avea ma pogai o le a lē fa'atasi mai ai le Agaga o Keriso ma i latou, o le a leai se feso'ota'iga ma i latou o fa'atasi ai, a e pe afai o lo'o fa'amaoni i se olaga lē agasala, o le a aumai loa agelu pa'ia i lo latou fa'alapotopotoga, ma o a latou 'upu o le a pei "o moli auro ia i 'ato ario togitogi fa'amamanuina" (Fa'ata'oto 25:11).

Taimi o le Iloiloga

I le tau mafanafana, a o tatou va'ai atu i la'au o le vaomatua, ua olaola lelei mai ma atonu e leai se 'ese'esega o la'au uma. Peita'i pe a lata i le tau malūlū, ma ua fa'a'ofu latou e le 'aia ma le kiona malūlū, o le a iloa ai la'au e olaola pea i lea tau ma la'au e 'ave'esea lau matagofie i lea taimi. E fa'apea i latou uma o ē savavali i le loto maulalo, o le tu'u'ese o latou uiga fa'apito a e u'umau i 'a'ao alofa o Keriso. O i latou e talitonu o latou e amio ato'atoa, e fa'atuatua iā i latou lava, o le a mavae'ese o latou ofu fa'afiaamionu pe a o'o mai afā o tofotofoga, a e o ē amiotonu moni, e alolofa ma matata'u fa'amaoni i le Atua, o le a 'o'ofu i le 'ofu o le amiotonu a Keriso, i taimi o le manuia fa'apea ma tofotofoga.

O le tu'u'ese o le fa'apito, tu'u atu o le ola mo isi, o le faia o mea lelei, agalelei, alofa, onosa'i, fa'amalosi i mea uma, ma le fa'atuatua o le Kerisiano moni, o fua ia i aso ta'itasi e maua mai iā i latou e feso'ota'i fa'amaoni ma le Atua. O a latou amio e lē fa'ailoa fa'alaua'itele i le lalolagi, peita'i e fetaia'i pea latou i aso uma ma fete'ena'iga ma le ti'apolo, a e manumalō mai nei sesē ma fa'aosoosoga. E maua pea e i latou le malosi ma le fa'afouina e ala i le tatalo ma le mataāla pea. E lē fa'aailoaina pe mata'i pea faigatā e o'o i nei 'au galulue; peita'i e silafia e le Atua mea lilo o le loto, e silasila Ia ma ma fa'amaonia taumafaiga uma e faia ma le fa'amaulalo ma le agamalū. E mana'omia le taimi o tofotofoga e fa'aalia ai le mamā pei o le auro o le amio e alofa ma fa'atuatua. Pe a o'o mai tofotofoga ma puapuagā i le ekalesia, o le a fa'atupuina ma atili fa'atumanu le sogasogā ma le alofa mutimutivale o so'o moni o Keriso.

E lagona le fa'anoanoa i le va'ai atu ua ta'ita'iina Kerisiano e ala i manatu sesē ma le suamalie fa'apea o latou e ato'atoa ma mamā, auā e faigatā atu ona toe fa'aui'ese mai le ala sesē ma toe fa'atū latou aga'i i le ala tonu. E faigofie le tosina i mea e lelei mai fafo, a e o le a lē iloa atu ai le matagofie o totonu mai le agamalū ma le loto maulalo o Keriso. O le a o'o mai le taimi e tofotofoina ai tagata uma, le taimi na manatu le to'atele e saogalemū, a e o le a iloa e leai se fa'avae o lea mea. E i ai ē foliga mai o poutū i le fale o le Atua, a e o le a

fa'aalia mai o i latou e pei o la'au pala sa valiina ia fa'amatagofie ai i le va'ai. Peita'i o ē loto maulalo, e tāua iā i latou ona pī'ima'u atu o latou agaga i le Papa e fa'avavau, o le a tūtūmau e lē mafa'agaioiina pe a o'o mai afā o tofotofoga, ona e lē fa'atuatua latou iā i latou lava. "A e ui lava i lea o le favae mau o le Atua e tū lava lea, o lo'o i ai lenei fa'aailoga, Ua silafia e le Ali'i Ōna lava tagata; atoa ma lea, Ia ō 'ese i le amio leaga i latou uma o ē ta'uta'u le suafa o Keriso" (II Timoteo 2:19).

Fua Mai i Fua e Tatau

O i latou e fia fa'aali a latou galuega lelei, e talanoa pea e fa'atatau i o latou uiga e lē agasala ma ta'uta'u atu ia fa'aailoa o latou tulaga fa'aleagaga ua 'ausia, a e ua na ona fa'aali atu ai ua fa'asesēina o latou lava agaga. O le tagata soifua malōlōina e fa'atasi atu ma se agaga fiafia i galuega o le olaga i aso ta'itasi a e na te lē alu atu ma se manatu e fia fa'alialia ōna itū uma i ē latou te fetaia'i i le ala. O le soifua malōlōina ma le tino malosi o tulaga ia o lona olaga ma e lē tau fa'aailoa atu fa'apea ona o lo'o fa'amalieina ia e le tele o fa'amanuiāga.

E fa'apea fo'i le tagata e amiotonu fa'amaoni. E lē manatu lava ia i sona lelei ma le amio atua. Ua 'avea ta'iala fa'aleagaga ma fa'avae o lona olaga ma le amio, ma o le uiga moni lea iā te ia ina ia fua mai fua o le Agaga fa'apei o le la'au e fua mai ai mati po o le la'au e fua mai ai le rosa e matagofie. Afai e matuā mautū i lona uiga moni le alofa i le Atua ma ōna uso ā tagata, o le a ia faia galuega mo Keriso ma le loto fa'amaoni.

O i latou uma e i ai i le si'osi'omaga o le olaga o le Kerisiano, o le a va'aia le matagofie ma le manogi o lona olaga, a e o le a ia lē manatu i ai, ona e ō gatasi ma ōna uiga masani. E tatalo ia mo le malamalama ma e fiafia e savali i lea malamalama. O lana mea'ai ma le mea inu, o le faia lea o le finagalo o lona Tamā i le lagi. O lona ola e puipuia e 'a'ao o Keriso; peita'i e lē 'avea ma mitamitaga pe fiavi'ia ai. E fiafia le Atua i lē agamalū ma loto maulalo, ē e mulimuli i tulaga'a'ao o le Matai. O agelu e fiafia e fa'atasi ma i latou ma e tumau ma i latou i o latou ala uma. Atonu o le a lē amana'ia i latou mai ē fa'aailoa mai a latou lava galuega lelei, peita'i o agelu a le Atua o le a fa'atasi mai pea ma si'omia i latou e pei o se puipui afi e saogalemū ai.

O le Ala na Te'ena ai Keriso

O lo tatou Fa'aola o le malamalama Ia o le lalolagi, a e le'i iloa o Ia e le lalolagi. Sa Ia faia pea galuega alofa, fa'asusulu atu le malamalama i auala mo tagata uma; peita'i Na te le'i vala'au iā latou na fa'atasi ai ma Ia ina ia vi'ia Lona uiga mamā, Lona lē fa'apito mo Ia lava, le agalelei, ma Lona soifua na tu'u atu mo le lelei o isi. E le'i tāua iā te Ia lea soifuāga. O Lona uiga fa'aleagaga na latou fa'alēaogāina ona e le'i talafeagai ma la latou tapula'a fa'afiaamiotonu. Sa talitonu latou e lē lava le tulaga fa'aleagaga o le amio po o le agaga o iā Keriso; auā o lo latou talitonuga e tele i le fa'aalialia, o le tatalo leo tele ia lauiloa e tagata uma, ma ia faia galuega lelei e fa'atāua ai. E ili fa'aleotele le pū mo a latou galuega lelei, e pei lava o ē ta'uta'u mai ua fa'apa'iaina. E fiafia e fa'aailoa mai e leai sa latou agasala, peita'i sa matuā 'ese lea mai le soifuāga atoa o Keriso. E le'i sa'ili e Ia se vi'iga po o se mamalu. O Āna galuega fa'amalōlō ofoofogia na faia ma le filemū, e ui ina e le'i mafai ona taofia le fiafia ma le loto fa'afetai o ē sa maua Āna fa'amanuiāga. E loto maulalo ma agamalū le uiga o Lona soifua. Ona o Lona uiga fa'amaulalo ma le lē fia fa'avi'ivi'i, e matuā 'ese mai o latou olaga, lea na lē mafai ai e le 'au Faresaio ona talia o Ia.

O le Loto Maulalo o le Fua o le Agaga

O le fua e aupito sili ona tāua o le fa'apa'iaina, o le maua lea o le loto maulalo. Pe a fa'atasi ai lenei uiga i le agaga, ona fausia lea o le amio e ala i lea uiga fa'atosina. O le a fa'atalitali pea i le Atua ma gaua'i atu i Lona finagalo. O le a iloa ma 'u'umau 'upu moni pa'ia uma, ma o le a gaua'i atu le loto i tulafono uma ma le lē muimui. O le agamalū moni e fa'amalūina le loto ma tu'u atu ai le mafaufau ia ō gatasi ma le 'upu ua tu'uina mai. E aumaia manatu uma ia usiusita'i iā Iesu Keriso. O le a tatala mai iā i tatou le loloto o le Afioga a le Atua, e pei ona tatalaina Litia, ma tu'u i tatou, fa'apei o Maria, ia a'oa'oina i 'a'ao o Iesu. "E ta'ita'iina e Ia o ē agamalū i le fa'amasinoga; na te a'oa'o mai fo'i i ē agamalū i Lona ala" (Salamo 25:9).

O le gagana a ē loto maulalo e lē fia fa'avi'ivi'i. A e tatalo i latou e pei o Samuelu a o tamaitiiti, "Fetalai mai ia, Ieova e, auā o lo'o fa'alologologo atu lau 'au'auna" (I Samuelu 3:9). Ina ua 'avea Iosua ma ta'ita'i o le fanauga a Isara'elu, sa ia fa'asagatau i fili uma o le Atua. Na fa'atumulia lona loto i mafaufauga e fa'atatau i lana galuega tāua. Peita'i ina ua fa'aalia mai se fe'au mai le lagi, na ia fa'atulagaina ia lava e pei o se tamaitiiti ina ia fa'atonuina. "Le Ali'i e, se ā se mea e te fetalai mai i lau 'au'auna?" (Iosua 5:14), o lana tali atu lea. O 'upu muamua a Paulo ina ua fa'aali mai Keriso iā te ia, "Le Ali'i e, se ā le mea e te finagalo i ai 'ou te faia?" (Galuega 9:6).

I le a'oga a Keriso, o le loto agamalū o se tasi lea o fua tāua o le Agaga. O se uiga e ala mai le Agaga Pa'ia, Lē e fa'apa'iaina, ma e mafai ai e lē ua i ai fa'apea ona pulea i taimi uma le maitaita gofie. Pe a iā i latou le loto maulalo ma ua lē fiafia i le tulaga e aga'i ai i le losivale, o le a latou taumafai loa e fa'aalu i lalo lea amio a e ia maua le uiga e mafai ai ona pulea le loto. O le a fa'ato'ilalo loa uiga e lē matagofie ma e lē pei o Iesu, a e o le a ō gatasi ma le fuafuāga mai le lagi se'ia o'o ina mafai ona usiusita'i i le fa'atonuga na tu'u mai, "Ia ta'itasi le tagata ma fa'ata'alise ona fa'alologologo, ia fa'agesegese ona tautala atu, ia fa'agesegese ona ita" (Iakopo 1:19).

Pe a ta'u mai e se tagata o ia ua fa'apa'iaina, a e fa'aalia mai i 'upu ma galuega le pogai 'ele'elea o lo'o fa'atafe mai ai suāvai 'o'ona, e mafai ona tatou fa'apea atu, "Ua fa'asesēina lea tagata." E tataua iā te ia ona a'oa'o mata'itusi o mata'upu o lo'o 'a'afia ai le olaga o le Kerisiano. E i ai nisi o lo'o fa'ailoa mai o 'au'auna latou a Keriso a e ua leva ona fa'apelepele le uiga lē alofa ma e fiafia lava i lea tulaga lē pa'ia ma tautala atu i 'upu e fa'atigāloto ma le tau fa'alili. E lē talia nei tagata e 'avea ma fanau a le Atua se'iloa ua suia a latou amio.

O le loto maulalo o le teuteuina lea mai totonu, e fa'atatauina e le Atua i se tau e sili le tele. E tautala le aposetolo i lea mea e aupito sili atu ma le aogā e sili i lo o le auro po o penina po o isi mea tautele. A teuteuina fafo ia fa'amatagofie ai le tino e pala, a o le loto maulalo o le a matagofie ai le agaga ma feso'ofa'atasi atu ai le tagata ma le Atua e fa'avavau. O le teuga lenei na filifili e le Atua lava ia. O Ia Lē na fa'atumulia le vānimonimo i le malamalama, ua folafola mai e ala i lea lava Agaga e tasi, "E fa'amatagofie e Ia i le olataga ē ua agamalū" (Salamo 149:4). O le a fa'ailoa mai e agelu o le lagi ē ua aupito sili le matagofie, o i latou ia o lo'o i le Ali'i o Iesu Keriso ma e savavali ma Ia i le loto maulalo ma le agamalū.

E maoa'e fa'ataunu'uga mo le Kerisiano, ma e taumafai pea ia e 'ausia se tapula'a e aupito sili ona maua atu. Sa iā Ioane le manatu e si'itia maua le tulaga o le Kerisiano ina ua ia fa'apea mai, "Fa'auta i le silisili o le alofa ua foa'iina mai e le Tamā iā te i tatou, ina ua ta'ua i tatou o le fanau a le Atua" (I Ioane 3:1). E leai se isi tulaga e sili a'e ona tāua ma fa'aaloaloga mo le aigā tagata i lo o lea ua fa'ailoa mai iinei. Ua tu'u mai i le tagata le avanoa e 'avea ai ma suli moni o le Atua, ma suli fa'atasi ai ma Keriso. Mo i latou ua fa'aeaina fa'apea, o lo'o ua fofola mai i ai 'olofa e lē mafaitaulia a Keriso, 'oa e sili atu i tau afe ona tāua i lo 'oa a le lalolagi. O le mea lea e ala i le lelei o Keriso, ua si'itia a'e ai le tagata lē aogā ia mau fa'atasi ma le Atua ma Lona Ālo pele.

O Le Fa'aa'oa'o a Tanielu

Matā'upu 2

O le perofeta o Tanielu o se tagata e mamalu lona uiga. O ia o se fa'aa'oa'o tāua i le mea e o'o i le tagata pe a ō gatasi ma le Atua e Ōna le poto aoao. Ua tu'u mai se tala'aga pu'upu'u i le olaga o lenei tagata pa'ia mo le fa'amalosi'aga iā i latou o ē o le a vala'auina ia lavatia tofotofoga ma fa'aosoosoga pe a o'o mai.

Ina ua 'ave fa'apagotā tagata Isara'elu, lo latou tupu, ali'i, ma faitaulaga, e to'afā sa filifilia e fai ma 'au'auna i le maota o le tupu Papelonía. O Tanielu, se tasi o lea to'afā, na fa'aalia mai lava i le amataga le atamai ma le tomai na fa'ateleina a o tuputupu a'e. O nei uma talavou e tupuga mai i aigā tupu, ma sa fa'amatala mai e fa'ata'au iā i latou, "o tama e lē ponā lava, a ua aulelei, o ē ua atamamai lava, ma ua iloa mea uma, o ē ua popoto lava" (Tanielu 1:4). Sa va'aia e le Tupu o Nepukanesa le maoa'e o taleni a nei pagotā talavou ma na filifili e saunia i latou mo tulaga tāua i lona malō. E feagai ai ma aganu'u o ia malō mai Sasa'e, pe a tofia i latou mo le olaga i le maota o le tupu, e tata'au ona a'oa'oina i le gagana fa'a-Papelonía, ma i le tolu tausaga, sa matuā a'oa'o ai i matā'upu ia pulea lelei ai le tino ma le mafaufau.

O talavou mai lenei a'oga sa fa'atagaina e ulufale i le maota o le tupu, ma sa saunia ia tata'au ona 'a'ai i mea 'a'i ma inu le uaina mai le la'o'ai a le tupu. Mai nei sauniuniga uma sa manatu le tupu ua ia tu'u atu se mamalu tele i o latou luga, ma ua latou maua fo'i le fa'amalosi'aga sili o le tino ma le mafaufau e mafai ona 'ausia.

Feiloā'i ma le Tofotofoga

Sa aofia ai i mea taumafa a le tupu 'a'ano o puā'a ma isi 'a'ano o manu e lē mamā, e ala i tulafono a Mose, ma sa matuā fa'asāina ona 'a'ai ai tagata Iutaia. O le tofotofoga faigatā lea na o'o iā Tanielu. E tata'au ea ona ia tumau i a'oa'oga mai ōna tua'ā e uiga i 'a'ano o manu ma mea inu, lē usita'i ai i le tupu, ma 'ave'esea ai mai lona tulaga pe 'ave ai fo'i ma lona ola? po o le fa'agalo o le tulafono a le Atua a e usiusita'i i fa'atonuga a le tupu ona maua ai lea o manuia ma tulaga fa'alelalolagi?

E le'i fa'atuai ona mafaufau Tanielu. Na filifili ia e tū tumau i lona uiga fa'amaoni, tusa pe o le ā le fa'ai'uga o le a maua. Ua ia manatu ifo i lona loto, "o le a lē leaga o ia i mea taumafa a le tupu, po o le uaina e inu ai o ia" (Tanielu 1:8).

Lē Vā Apiapi po o le Lē Fautuaina

E to'atele i latou e ta'u mai o Kerisiano a e manatu e vāapiapi le mafaufau o Tanielu, e lē fautuaina ma e fa'aailoga tagata. E manatu mamā i latou e fa'ata'au i mea'ai ma mea inu, ia lē tū mamafa i lea mea - atonu o lea tū o le a lē iloa atu ai fa'amanuiāga uma fa'alelalolagi. Peita'i o ē fa'apea o latou manatu, pe a o'o i le aso o le fa'amasinoga o le a latou iloa ai ua latou liliu 'ese mai mana'oga a le Atua a e fa'atū mai o latou lava manatu e fai ma tapula'a o le sa'o ma le sesē. O le a iloa mea sa foliga mai e lē tāua iā i latou a e o le a lē fa'apea i le fa'ata'au a le Atua. Sa tata'au ona usiusita'i i mea ua fa'aailoa mai o lo'o mana'omia e le Atua. O ē talia ma usiusita'i i se tasi o Āna tulafono ona e faigofie ona fai, a e tete'e se isi ona pe a faia e mana'omia ai le ofo atu o ia lava, o le a tu'u fa'amaulalo ifo le tapula'a o le mea sa'o ma ta'ita'i ai isi ia lē fa'atāuaina le tulafono pa'ia a le Atua, e ala i la latou fa'aa'oa'o. Ia 'avea 'upu "Ua fa'apea ona fetalai mai le Ali'i" e pulea ai i tatou i mea uma.

O le Uiga e Leai se Fa'alētonu

Sa feagai pea Tanielu ma fa'aosoosoga e aupito faigatā, a e o lo'o fetaia'i fo'i ma talavou o nei ōna pō; peita'i sa fa'amaoni pea ia i a'oa'oga fa'aleagaga na ia maua i lona olaga a o la'ititi. Na si'omia o ia i mea fa'atosina sa taumafai ai ia fa'aliliu'ese i latou o ē lē mautonu e fa'ataua i ta'iala ma mana'oga; peita'i o lo'o fa'ailoa mai e le Afioga a le Atua lona uiga e leai se pona. E le'i fa'atuatua Tanielu i lona lava malosī, a e na talitonu o le tatalo o se mea e na te mana'omia. O le Atua na 'avea ma pogai o lona malosī, ma sa i ōna luma pea, i fa'agaoioiga uma o lona olaga, le mata'u i le Atua.

Sa iā Tanielu le uiga loto fa'amaulalo moni. O ia na fa'amaoni, mautū, ma uiga fa'atamali'i. Na sa'ili lava ia e mau filemū ma tagata uma, a e pei o le la'au o le arasi, sa lē mafai ona gausia lona mausalī i ta'iala. I so'o se mea e lē fete'ena'i ai ma lona uiga fa'amaoni i le Atua, sa usiusita'i ma fa'aaloalogia e ia ē tulaga maualuga ma o lo'o i ai le pule; peita'i sa tū aupito i maualuga le Atua i lo o ta'ita'i fa'alelalolagi. E le'i mafai ona tosina 'ese ia e le manatu fa'apito mo ia lava ina ia ta'ita'i 'ese ai mai lana galuega.

O le amio a Tanielu ua tu'uina i le lalolagi e 'avea ma fa'aa'oa'oga tāua o le mea e mafai ona faia e le alofa tunoa o le Atua mo le tagata ua pa'ū ma fa'alēaogāina e le agasala. O lenei olaga agamalū ma e fa'atamali'i o se fa'amalosī'aga lea mo le aigā tagata, ia mafai ai ona maua le malosī e tete'e ai i fa'aosoosoga ma ia tū mausalī mo mea e tonu pe a o'o mai tofotofoga e matuā faigatā lava.

O le Fa'amaoniga a le Atua e Pele i lo le Ola

Atonu na mafai e Tanielu ona maua se faitioga ia liliu'ese ai mai āna tū masani, a e peita'i sa pele iā te ia lona Atua i lo o manuia sa ofo mai e le ta'ita'i pule aoao fa'alelalolagi - na sili atu ona pele i lo o lona lava ola. Ona o lana uiga fa'aaloalo, sa agalelei mai le pule o leoleo i lenei talavou Iutaia, ma na talosaga atu Tanielu ina ia lē 'a'ai i mea taumafa a le tupu pe inu i lana uaina. Sa fefe le ta'ita'i'au ona ua manatu ia, pe a lē 'a'ai i mea'ai lelei mai le la'o'ai a le tupu, o le a fa'ama'ia ma tino vaivai ai ia talavou o lo'o i lalo o lana tausiga, ma o le a fa'alētonu ai fo'i ma lona ia ola. E pei o le to'atele i nei ona pō, o le manatu pe a tele mea'ai taugatā ma foliga mai e lelei i le va'ai, o le a maua ai le tino malosī ma le soifua malōlōina, a e maise le mafaufau.

Sa talosaga Tanielu ina ia tu'u mai aso e sefulu e tofotofo ai - aso ia e fa'ataga ai latou ina ia 'a'ai i mea'ai e faigofie ma mamā ma le suāvai e inu ai, a e ia feagai pea isi uma talavou ma mea'ai mai le laulau a le tupu. E ui o ia e na o se talavou a e sa na va'aia e ia le leaga o le inu i le uaina ma le olaga e lē taupulea e afāina ai le soifua malōlōina o le tino ma le mafaufau.

Ua Fa'amaonia e le Atua Lana 'Au'auna

Ina ua mae'a aso e sefulu, o le i'uga ua matuā 'ese nai lo le mea sa mafaufauina e le 'au'auna. Sa lē na o i foliga, a e fa'apea le malolosi o tino ma le maoa'e o mafaufau o i latou ia sa lē so'onafaia a latou masaniga, ma sa sili a'e i mea uma nai o latou sa fa'amalie tu'inaanau o mea fa'aletino. Ina ua fa'ai'uina lenei tofotofoa sa fa'atagaina loa Tanielu ma āna uō e fa'aa'ua' pea a latou mea'ai faigofie ma mea inu a o alu pea a'oa'oga mo galuega e latou te faia o le malō.

Sa fa'amanuiaina e le Atua le sogasogā ma le lē manatu fa'apito o nei talavou Eperu. Na Ia tu'uina "iā te i latou le fa'autauta ma le atamai i tusi uma lava, atoa ma le poto; a o Tanielu ua poto ia i fa'aaliga uma lava ma miti" (Tanielu 1:17). Ina ua uma tausaga e tolu o a'oa'oga, ina ua tofotofoina e le tupu le poto ma le tomai ua 'ausia, na ia "lē maua se tasi o i latou e tusa ma Tanielu, ma Hanania, ma Mesaclu, ma Asaria; ona latou tutū ai lea i luma o le tupu. O mea uma lava e o'o ai le poto ma le fa'autauta na fesili atu ai le tupu iā te i latou, ua iloa ai e ia ua sāutuasefulu ona sili o lo latou poto i taulāitu, ma va'afa'atau uma i lona malō uma lava" (F. 19, 20).

Pulea o ia Lava o se Tulaga o le Fa'apa'iaina

O le olaga o Tanielu o se ata fa'ate'i loto e fa'ataua i le uiga o lē ua fa'apa'iaina. O lo'o tu'u mai ai mo tagata uma, a e maise le 'au laiti se a'oa'oga tāua. O le tū malosī e mulimuli i mana'oga a le Atua, e aogā lea mo le soifua malōlōina o le tino ma le mafaufau. Ina ia taunu'u i le tapula'a e aupito maualuga ma 'ausia ai le amio e

tonu ma le atamai, e mana'omia ia sa'ili le poto ma le malosi mai le Atua ma ia tausisi e usiusita'i ina ia tausi ma le lē so'onafai masaniga lelei uma o le olaga. I gaoioiga a Tanielu ma āna uō na latou maua ai fa'ata'ita'iga o le manumalō o ta'iala mai fa'aosoosoga e gaua'i atu ai i tu'inanau fa'aletino. E fa'ailoa mai ai iā i tatou, e ala i ta'iala fa'aleagaga, e mafai e taulele'a talavou ona fa'ato'ilalo tu'inanau o le tino ma fa'amaoni pea i le finagalo o le Atua, tusa pe fa'atauina i se tau e tele.

Mata o le ā le fa'ai'uga pe ana faia e Tanielu ma āna uō se tu'utu'uga ma ia fitafita fa'apaupau, ma gaua'i atu i tu'inanau tau i mea'ai ma mea inu pei o le aganu'u fa'a-Papelonia? Pe ana tyupu lea mea e tasi ma ō 'ese ai mai ta'iala, se manū o le a fa'avaivaiina ai le lagona o le mea sa'o ma lo latou 'ino'ino i le sesē. O le fa'amalieina o tu'inanau i mea 'ai e 'ave'esea ai le malosi tauletino, o le mafaufau manino, ma le malosi fa'aleagaga. A tasi se la'asaga e ui sesē, o le a mulimuli mai ai fo'i ma nisi, se'ia o'o ina motusia le so'otaga ma le lagi, ma i'u ina tafi 'esea ai e fa'aosoosoga.

Ua fetalai mai le Atua, "O ē fa'asili iā te A'u, 'Ou te fa'asili iā te i latou" (I Samuelu 2:30). A o tumau pea Tanielu i lona Atua ma le fa'atuatua e mautū, na o'o i ōna luga le mana o le Agaga o valo'aga. A o fa'atonuina o ia e tagata e fa'atatau i gaoioiga o le olaga i totonu o le maota o le tupu, sa a'oa'oina o ia e le Atua e fa'atatau i mea lilo o tupulaga o i lumana'i, ma ia tu'uina atu i ia augātupulaga, e ala i fa'aailoga ma fa'atusatusaga, o mea ofoofogia o le a o'o mai i aso o le i'uga.

O Le Pulea o Mana'oga ma Tu'inanau

Matā'upu 3

"Ia mamao outou ma tu'inanau o le tino, o mea ia e tau ma le agaga" (I Peteru 2:11), o le gagana lea a le aposetolo o Peteru. E to'atele e manatu o nei fuai'upu e na o se lapata'iga e fa'atatau i le amiolēmamā, peita'i e lautele lona uiga. O lea e fa'asā mai ai le fa'amalieina o tu'inanau 'ese'ese uma. Ia lē so'onafai ma lē popole le soifua malōlōina o le tino e i latou o lo'o ta'u le amioatua, ma fa'apea mai e lē o se agasala le amio e lē taupulea, ma o le a lē afāina ai fo'i le ola fa'aleagaga. So'o se masaniga e lē fa'aleleia ai le soifua malōlōina e fa'aleagaina ai le malosi po o le pulea o mea e mafai ona faia. Afai e masani ona fa'aaogā o mea'ai ma mea inu e lē lelei, o le a aumai ai manatu ma gaoioiga sesē. O le fa'amalieina o le tu'inanau i mea'ai e fa'amalosia ai amio fa'amanu ma o le a si'i maua luga a'e i lo'o le malosi fa'aleagaga ma le pulea o le mafaufau.

E lē mafai e se tasi ona fiafia i manuia mai le fa'apa'iāga a o loto fa'apito ma malie e faia tu'inanau fa'aletino. E mafatia le to'atele i lalo o 'avega o fa'ama'i ma vaivaiga ona o mea'ai ma mea inu lē lelei ua masani ai, o mea ia e fa'ataugā ai i tulafono o le olaga ma le soifua malōlōina. O mea ia e fa'aleagaina ai, a e maise itūtino e fa'atatau i fegaoioiga o mea'ai ma mea inu. E matuā ofoofogia le malosi o le tino o le tagata e tete'e atu i le so'onafai, peita'i o le faifai pea o le so'ona 'ai ma inu i mea e lē tatau e pei ona masani ai, o le a fa'avaivaiina ai itūtino uma. E o'o lava i ē ta'ua o Kerisiano o le a fa'avaivaia le tino, le mafaufau, ma le pulea o iga uma ona o le fa'amalieina o tu'inanau 'ese'ese. Ia fa'ailoa atu i nei agaga vaivai le mea atonu o le a mafai ona 'ausia pe ana ola i se olaga e lē fa'ataugā, ma si'itia ai le tulaga o le soifua malōlōina a e lē o le so'onafai.

E Lē o se Tapula'a e lē Mafai ona 'Ausia

Ina ua tusi Paulo ina "Ia ato'atoa ona fa'apa'iaina o outou e le Atua lava e ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso" (I Tesalonia 5:23), na te le'i vala'auina ōna uso iā Keriso e tausisi i se tapula'a e lē mafai ona latou 'ausia; e le'i tatalo fo'i ia ina ia latou maua fa'amanuiāga e lē finagalo le Atua e tu'u atu. Na iloa e ia o i latou uma e mafai ona fetaia'i ma Keriso, e tatau ona iā i latou amio e mamā ma e pa'ia. "O i latou uma o ē fai aigofie e fai fa'atatau i mea uma lava; o i latou fo'i ua latou fa'apea ina ia maua le pale palagofie, a o i tatou, ina ia maua le pale e lē pala lava. O a'u nei fo'i, ua fa'apea ona 'ou momo'e e lē ma le fa'aletonu; ua fa'apea ona 'ou tu'i, e lē pei o sē tu'i le matagi. A 'ou te fa'ato'ilaloina lo'u nei tino, ma a'u fai ai ma pologa, ina ne'i i'u ina lē fa'amaoni a'u, o a'u sa tala'i atu i isi tagata" (I Korinito 9:25 - 27), ma "Tou te lē iloa ea, o lo outou tino o le malumalu lea o le Agaga Pa'ia ua i totonu iā te outou, o lo'o ua iā te outou mai le Atua, e lē aiā fo'i outou iā te outou? Auā ua fa'atauina outou i le tau; o lenei, ia outou vivi'i atu i le Atua i o outou tino ma o outou agaga, o mea a le Atua ia" (I Korinito 6:19, 20).

Se Taulaga e Lē Ponā

Na toe tusi fo'i le aposetolo i ē talitonu, "O lenei, le au uso e, 'ou te 'ai'oi atu iā te outou, ona o le alofa mutimuti vale o le Atua, ia outou tu'uina atu o outou tino i le Atua, o le taulaga ola, ma le pa'ia, ma le mālīe, o le mea lea e tatau ai ona outou faia" (Roma 12:1). Sa tu'u mai fa'atonuga fa'apitoa iā Isara'elu anamua ia leai ni manu e fa'ama'ia pe i ai pona e tatau ona tu'uina fa'ataulaga i le Atua, a e na o manu e ato'atoa e filifilia mo lenei fuafuāga. E ala mai le perofeta o Malaki, sa matuā a'oa'i e le Ali'i Ōna tagata ina ua ō 'ese mai nei fa'atonuga.

"E āva le atali'i i lona tamā, e āva fo'i le 'au'auna i lona ali'i; afai o A'u o le Tamā, o ifea ni O'u āva? afai fo'i o A'u o le Ali'i, o ifea Lo'u mata'utia? ua fetalai mai ai Ieova o 'au iā te outou faitaulaga o ē 'ino'ino i Lo'u

igoa; a ua outou fai mai, Ua matou ino'ino i Lou suafa i ni ā? Ua 'ino'ino ina ua outou au mai o mea e 'ai ua leaga i La'u fata faitaulaga; a ua outou fai mai, Ua leaga 'Oe iā te i matou i ni ā? Ua leaga ina ua outou fai ane, O le la'oai a Ieova, o le mea fa'atauva'a lava lea. A outou aumaia le mea tauaso e fai ma taulaga, e lē leaga ea? A outou aumaia le mea pipili ma le mea e ma'i, e lē leaga ea? Se'i avatu ia i le ali'i e pule iā te oe; pe fiafia mai ea o ia iā te oe? pe talia mai oe e ia? ua fetalai mai ai Ieova o 'au. O lenei, ia outou ōle atu i luma o le Atua ina ia alofa mai o la iā te i tatou; ua tupu mai iā te outou lenei mea; pe na te talia mai ea outou? ua fetalai mai ai Ieova o 'au.... Ua outou fai ane fo'i, Auē, o le mea tigā na'uā! ma outou 'ino'ino i ai ua fetalai mai ai Ieova o 'au; ua outou aumaia fo'i le mea ua faoa, ma le mea pipili, ma le mea e ma'i; ua outou au mai ai ma taulaga? 'Ou te talia ea lea mea ai o outou lima? ua fetalai mai ai Ieova" (Malaki 1:6-13).

O nei fetalai e i ai a'oa'oga mo tagata o le Atua o ōna pō nei, e ui ina sa tu'u mai iā Isara'elu anamua. Ina ua ōle atu le aposetolo i ōna uso ia ofoina o latou tino "i le Atua, o le taulaga ola, ma le pa'ia, ma le mālīe" (Roma 12:1), na ia tu'u mai ai ma ta'iala o le fa'apa'iāga moni. E lē ia na o se mea e mafaufauina, se lagona, po o ni 'upu, peita'i o ta'iala e ola, e gaoioi, e feagai ma le tagata i aso ta'itasi o le olaga. E mana'omia ia fai a tatou masaniga e fa'ataui i mea'ai, mea inu, ma lavalava, ina ia puipuia ai le soifua malōlōina tau le tino, le mafaufau, ma le amiotatau, ina ia mafai ona tu'uina i le Ali'i o tatou tino, ia lē o se taulaga ua fa'aleagaina e agasesē, a e "o se taulaga e ola, e pa'ia, ma e mālīe i le Atua."

Vaila'au Fa'aāla ma Vaila'au Fa'agase Mafaufau

O le lapata'iga a Peteru ia 'alo'ese mai tu'inaanau tauletino, o se lapata'iga e aupito malosi ma e fai sa'o mai ia 'aua le fa'aaogāina mea e i ai vaila'au e fa'asāina, e i ai le ti, kofe, tapa'a, ma le 'ava malosi. A amata ona fa'amalieina o nei masaniga a o la'itiiti, o le a malosi le 'u'umau o le tagata ia fa'apagotāina ai e le tu'inaanau ma o le a tu'u fa'amaulalo ai le tapula'a fa'aleagaga.

O le a lē mafai e a'oa'oga mai le Tusi Pa'ia ona fa'amalosia itūtino ua fa'aleagaina e ala i le fa'amalieina o tu'inaanau. E afē ma afē ē o le a lafoa'i 'ese e lē na o le soifua malōlōina ma le ola, a e fa'apea le fa'amoemoe mo le lagi ona o le a lē fia tete'e i a latou tu'inaanau leaga. Pe afai e fa'amautūina se tupua i le agaga, o le a tu'uina loa Keriso i se tulaga e maualalo ifo.

Tu'inaanau e Fa'asagatau i le Agaga

So'o se mea o lo'o i ai i latou, o ē ua fa'apa'iaina moni o le a si'itia i luga le tapula'a o le amiotatau e ala i le tausia o masaniga lelei e tauletino, ma e fa'apei o Tanielu, e tu'u mai i isi se fa'ata'ita'iga o le lē so'onafai ma le tu'u'esea o ia lava mana'oga. O fa'anaunauga lē mamā uma e 'avea o tu'inaanau e fetaua'i, ma o mea uma e fete'ena'i ma tulafono fa'anatura e tupu ai tulaga e lē manuia o le agaga. O le fa'amalieina o le tu'inaanau o mea'ai e tupu ai le fa'alētonu o le manava, o le ate vevela, fa'anenefu ai le mafaufau, e maua gofie i le loto ita ma fa'avaivaiina ai le agaga o le tagata. E lē talia e le Atua ē e fia tu'u atu latou fa'ataulaga vaganā e lē ponā. O le ala lea e tataui ai iā i tatou ona fa'a ō gatasi a tatou mana'oga i mea'ai e lelei mo le tino ma a tatou masaniga o le olaga ia tusai ma tulafono fa'anatura. Pe ana fai e iloilo ina au'ili'ili tino e tu'u i luga o le fata faitaulaga a le Atua fa'apei ona faia i tulaga fa'a-Iutaia, mata o ai o le a mafai ona taliaina?

E tataui ona taui ma le fa'aeteete e le Kerisiano āna tū masani, ina ia puipuia atili ai le malosi o itū tino uma auā le 'au'auna atu iā Keriso. Pe afai e fa'apa'iaina i tatou i le agaga, le tino, ma le mafaufau, o le a tataui loa ona ola i se olaga e ō gatasi ma le tulafono o mea uma na foafoaina. E lē mafai e le loto ona fa'amaoni i le Atua a o fa'amalieina pea tu'inaanau uma o le tino ma mea 'ai, a e fa'aleagaina ai fo'i le soifua malōlōina ma le ola. O i latou e lē usiusita'i i tulafono e fa'avae ai le soifua malōlōina, o le a tataui fo'i ona mafatia ai i le fa'asalaga. O i latou ia ua lē mafai ona faia se mea e fesoasoani atu ai i isi, ma ua lē mafai ona tali le vala'au a le Atua.

Ina ua talosagaina e ta'ita'i fa'aleagaga o Sikotilani le Ali'i Sili o Egelani ina ia filifili se aso mo talosaga ma 'anapogi ia fa'ate'a'ese ai le fa'ama'i vevela mata'utia (o le cholera), na tali mai ia, "Ia fa'amamā ma fa'availa'au o outou fale ma auala, ia fa'amalosia le tūmamā ma le soifua malōlōina i tagata matitiva, va'ai ia tele ma lava mea'ai ma lavalava mo i latou, ia fa'aaogā tulaga e tonu ma tataui e puipuia ai le olamamā, ona outou lē

mana'omia lea o le anapogi ma le tatalo. O le a lē fa'afofoga mai le Atua i a outou talosaga pe a lē o faia e outou Āna fofō e puipuia ai mai fa'ama'i."

Ua fa'apea mai Paulo, "Ia tatou fa'amamā iā te i tatou i mea uma e leaga ai le tino atoa ma le agaga, ia fa'a'ato'atoina lo outou fa'apa'iaina i le mata'u i le Atua" (II Korinito 7:1). Ua ia tu'uina mo so tatou fa'amalosi'aga le sa'olotoga o lo'o maua e i latou ua fa'apa'iaina moni: "O lenei, ua leai se fa'asala i ē o iā Keriso Iesu, o ē lē savavali i la le tino, a e i la le Agaga" (Roma 8:1). Na ia tu'uina se lu'iga i tagata Kalatia, "Ia outou savavali i la le Agaga, ona lē faia lea e outou o le tu'inanau o le tino" (Kalatia 5:16), ma na ia fa'aigoaina isi itū'aiga tu'inanau fa'aletino - "o le ifo i tupua,... o le onāga,... ma mea fa'apenā" (fuai'upu 20, 21). Ina ua uma ona fa'aailoa mai fua o le Agaga, e i ai le lē so'onafai, na ia toe fa'aopoopo mai, "O ē o iā Keriso, ua fa'asatauroina e i latou le tino, ma ōna mana'o, ma ōna tu'inanau" (F. 24).

O le Tapa'a

Ua fa'apea mai le aposetolo o Iakopo, o le poto mai lugā e "muamua ona mamā" (Iakopo 3:17). Pe ana va'ai ia i sona uso o fa'aaogāina le tapa'a, mata e na te lē ta'uvaleina lea masani e "la le lalolagi ia, o le mea fa'aletino, o le fa'atemoni ia" (F. 15)? I nei ona pō o le malamalama fa'a-Kerisiano, e fa'afia ona ta'uta'u le suafa pa'ia o Keriso e laugutu ua 'ele'elea i le tapa'a ma le māmāva ua fa'aleagaina e le manogi leaga. O le agaga e mafai ona fiafia i lea tulaga lē mamā e tatau lava fo'i ona tū 'ele'elea. E pei ona 'ou va'aia i ē ua fa'aailoa mai e fiafia i fa'amanuiāga o le ola e fa'apa'iaina, a o lo'o fa'apagotāina e le tapa'a, e fa'aleagaina mea uma o lo latou si'osi'omaga. Ona 'ou manatu lea, E fa'apefea le va'aiga o le lagi pe a ua ūlu i ai tagata e fa'aaogā le tapa'a? Ua manino ona fetalai mai le Atua i Lana afioga "E lē sao atu lava i ai se mea leaga e tasi" (Fa'aaliga 21:27). O le a fa'apefea la ona mafai e i latou o ē fa'amalieina lenei tu'inanau 'ele'elea ona fa'amoemoe e ūlu atu i le lagi?

O tagata e na ona ta'u lo latou amioatua e ofo atu pea o latou tino i le fata faitaulaga a Satani ma fa'amū ai le taulaga manogi o le tapa'a i lona mamalu fa'asatani. O lenei 'upu e mata'utia, ona o lenei taulaga sa faia i se atua. Ona o le Atua e mamā ma pa'ia, e na te lē talia se mea e 'ele'elea lona uiga, o le a tatau ai ona Ia te'ena lenei taulaga e tautele, e palapalā, ma e lē pa'ia. O le mea lea ua tatou iloa ai ma le mautino o Satani lea ua na talia le fa'amamāluga.

Na malia Keriso e lavea'i le tagata mai le 'u'umau a Satani. Na afio mai o Ia e fa'asa'oloto i tatou, e ala i le toto mai Lana taulaga mo le fa'amagaloina o agasala. O le tagata ua 'avea ma mea totino a Iesu Keriso, ma o lona tino ua fai ma malumalu a le Agaga Pa'ia, o le a lē toe fai ma pagotā a le masaniga leaga o le fa'aaogā ta'pa'a. O lona malosi e ā Keriso lea, o Lē na fa'atauina ia i le tau o le toto. O ia o le mea totino a le Ali'i. E fa'apefea ona lē agasala ia pe a o fa'aaogā itūlā o aso uma i le fa'amalieina o se tu'inanau e leai se fa'avae i le natura?

E matuā tele le tupe e fa'aalu fa'ama'imau i tausaga uma mo le fa'amalieina o lenei tu'inanau, a e o lo'o fano agaga e to'atele ona o le mana'omia o le 'Upu o le Ola. O ē o lo'o ta'u mai o latou o Kerisiano ua latou fāoa pea mea a le Atua, i sefulua'i ma taulaga, a o lo'o latou ōfo atu i luga o le fata faitaulaga le tu'inanau e malaia ai, i le fa'aaogā o le tapa'a, e sili atu i lo o le tu'u o le fesoasoani mo ē matitiva po o le avatu o mea o lo'o mana'omia mo le galuega a le Atua. O i latou ua fa'apa'iaina moni o le a mafai ona fa'ato'ilalo tu'inanau leaga uma. O le a mafai ona fa'au'i atu 'olua sa fa'aaogā lē tatau i le fale teumea a le Ali'i, ma o le a ta'ita'iina le Kerisiano ia fa'afitia ia lava, ia ofo atu fa'ataulaga, ma ia lē toe fa'ataugā. Ona 'avea ai loa lea o i latou ma malamalama o le lalolagi.

O le Lau Ti ma le Kofe

O le tī ma le kofe, fa'apea ma le tapa'a e i ai le vaila'au 'ona e afāina ai le tino o le tagata. O le kofe ma le tapa'a e fa'anefuina ai le mafaufau ma fa'aitiitia ai le malosi o le tino. O su'esu'ega uma ua aumaia e fa'atatau i le leaga o le tapa'a e tatau fo'i lea mo le fa'aaogāina o le tī ma le kofe.

O i latou ua masani i le fa'aaogāina o le tī, kofe, tapa'a, vaila'au e fa'asāina, po o le 'ava malosi, pe a 'ave'esea lea tu'inanau, o le a lē mafai e latou ona tosina atu ma le fiafia ma le sogasogā e tapua'i i le Atua. E

foliga ua leai se mana o le alofa tunoa o le Atua e toe fa'aolaola ma fa'amalosia ai le fa'aleagaga o a latou talosaga po o a latou molimau. E tatau iā i latou ua ta'ua o Kerisiano ona manatunatu i le pogai o lo latou fiafia. E sau mai lugā po o lalō?

I le tagata o lo'o fa'aaogā vaila'au fa'asāina, pe a lē fa'amalieina lea tu'inaanau, o mea uma o le a foliga salafalafa ma ua lē manino. O le a tineia le lagona moni o le tino ma le mafaufau, ma o le a faigatā ona lagona e ia le mana fa'atosina o le Agaga Pa'ia. Pe a leai ia vaila'au e pei ona masani ai, o le a i ai se mana'oga e le tino ma le agaga, e lē mo le amiotonu, lē mo le mamalu, e lē mo le fa'atasi mai o le Atua, a e mo le tupua ua pele i lona loto. I le fa'amalieina o tu'inaanau, o le a fa'avaivaiina ai loa i aso ta'itasi lo latou malosia, ma lē mafai ai ona fa'amamaluina le Atua.

O le Ogāumu 'A'asa

Matā'upu 4

I le tausaga lava sa amata ai le galuega a Tanielu ma āna uō mo le tupu o Papelonía, sa i ai mea na tutupu sa matuā tofotofoina ai le uiga tonu o nei talavou Iutaia, ma fa'amaonia ai i luma o le malō fa'apaupau le mana ma le amiotonu o le Atua o Isara'elu.

A o tepataula'i le Tupu o Nepukanesa ma lona lagona e i ai le mea o le a tupu, na fai sana miti ofoofogia ma na matuā fa'apopoleina ai o ia, "ma ua lē iloa e ia sina moe" (Tanielu 2:1). O lenei miti o le pō sa matuā afāina ai lona mafaufau, a e peita'i sa lē mafai e ia ona manatua au'ilili se mea fa'apito. Na ia vala'au i āna va'aifetū ma taulāitu ma na ofo i ai 'oa ma mamalu pe afai latou te fa'amatala iā te ia le miti ma lona uiga. Peita'i sa latou fa'apea ane, "Ia e fetalai mai le fa'alepō i āu 'au'auna, ona matou fa'aali atu ai lea o le uiga" (Tanielu 2:4).

Pe afai e latou te mafai ona fa'amatala le uiga, e silafia e le tupu o le a mafai fo'i ona latou iloa le miti. Ona o Lana ta'ita'iga alofa, sa tu'u ai e le Ali'i iā Nepukanesa lenei miti, ma le mafuaaga na fa'agalo ai, e ui ina sa matuā afāina lona mafaufau, a e ina ia fa'ailoa ai amio fa'afoliga o le 'au popoto a Papelonía. Sa matuā ita le tupu ma ua ta'u atu e fasiotia i latou uma pe a lē mafai ona fa'ailoaina le miti i le taimi o lo'o tu'u mai. O le a fa'aumatia ai fo'i ma Tanielu ma āna uō fa'atasi ma le 'au perofeta pepelo; peita'i sa tula'i Tanielu ma ulu atu i luma o le tupu, ma talosaga atu mo sina taimi ina ia mafai ona ia sauni e fa'ailoa le miti ma lona uiga.

Sa fa'ataga e le tupu lenei talosaga; na fa'apotopoto Tanielu ma āna uō ma latou avatu i luma o le Atua lea matā'upu, ma ua sa'ili i latou mo le poto e na o le Pogai o le malamalama ma le atamai e maua mai ai. E ui ina fa'atasi ai i latou i le maota o le tupu ma o lo'o si'omia pea i fa'asoosoga, a e le'i galo iā i latou lo latou tiute i le Atua. Sa matuā manino i o latou mafaufau Lana ta'ita'iga ua o'o ai i le tulaga ua i ai; o lea o lo'o latou faia Lana galuega, fa'ataunu'u mea uma ua vala'auina ai i latou e le 'upu moni ma le tiute. E talitonu fa'amaoni i latou i le Atua. E liliu i latou i le Atua mo le malosia pe a i ai faigatā ma fa'alētonu, ma e fa'atasi pea Ia ma i latou, o lo latou fesoasoani.

Ua Fa'ailoa le Mea Lilo

E le'i i ai se talosaga mai au'auna a le Atua sa lē aogā. Na latou fa'amamaluina Ia i taimi uma, ma i itulā o tofotofofa, na fa'amamalu i latou e Ia. Sa fa'aalia le mea lilo iā Tanielu ma na alu fa'avave e talosaga se feiloā'iga ma le tupu.

E ui ina si'omia le tupu e āna 'oa ma le mamalu, a e sa matuā mafatia lona loto a o lo'o tula'i atu i ōna luma le talavou Iutaia, o lona agaga e filemū ma fiafia i lona Atua. O le taimi nei e mafai ai e Tanielu ona fa'aeaina ia lava, ina ia fa'amuamua ai ia ona o lona lelei ma lona poto maoa'e. Peita'i sa ia muā'i taumafai e fa'aui'ese vi'iga mo ia a e fa'aeaina le Atua ona o Ia o le pogai o le poto.

"E lē mafai i ē popoto, ma va'afa'atau, ma taulāitu, ma ē o popoto i fetū, ona fa'aali atu i le tupu o le mea a le tupu ua lilo na ia fetalai atu ai. A o i ai le Atua i le lagi, o Lē na te fa'aalia mea ua lilo, ma fa'ailoa mai iā Nepukanesa le tupu o mea e o'o mai i aso amulī" (Tanielu 2:27, 28). Sa fa'alogologo le tupu i vaega uma o lo'o fa'amatala āu'ilili uma mai o le miti; ina ua mae'a ona ta'u mai le uiga, na lagona e ia e na te mafai ona talitonu o se fa'aaliga lava lea mai le Atua.

O 'upu moni sa tu'u mai i lenei fa'aaliga o le pō sa matuā afāina ai le mafaufau o le Tupu o Nepukanesa; ma le loto maulalo ma le āva tele, na ia fa'apa'ū i lalo ma tapuā'i i le Atua, ma fa'apea mai, "E moni, o lo outou Atua o le Atua o atua ia, ma le Ali'i o tupu, o Lē fa'aali fo'i i mea ua lilo" (F. 47).

O le Fa'atusa Auro

Sa fa'asusuluina le malamalama mai le lagi i luga o le Tupu o Nepukanesa, ma e mo sina taimi na osofia ia i le mata'u i le Atua. Peita'i sa fa'atumulia lona loto i le mitamitavale ona o fa'amanuiāga e tele, ma sa galo iā te ia lana molimauina o le Atua soifua. Na toe fa'aauau pea ma le ma'elegā lana ifo i tupua fa'apea le olaga so'onafai.

Na ia fausia se fa'atusa auro mai 'olua sa ia maua mai taua, e pei o lea sa ia va'aia i lana miti, ua faatū i le fanua laugatasi o Tura, ma ua ia fa'atonu ta'ita'i ma tagata uma e tapuā'i ma ifo i ai, a lē o lea o le a oti. O le tupua e 90 futu le umi a e 9 lona lautele, ma i le va'ai a ia tagata ifo tupua sa tu'u mai ai se fa'aaliga e aupito sili le maualuga ma le mamalu. Sa alu le fa'aaliga e vala'au ai tagata uma o le malō ina ia fa'apotopoto mo le fa'apa'iāga o le tupua, ia ifo i lalo ma tapua'i i ai pe a fa'alogoia le leo o la'au pese. Pe a i ai se tasi e lē usiusita'i i ai, o le a lafoina i totonu o le ogāumu 'a'asa.

Ua o'o i le aso na filifilia ma ua fa'apotopoto mai uma le malō, ona aumai lea o le tala i le tupu e fa'atatau i talavou Iutaia e to'atolu sa ia fa'atū i luga o itūmalō o Papelonía, ua latou lē tapuā'i i le fa'atusa. O uō lava ia a Tanielu sa fa'aigoa e le tupu, o Sataraka, Mesako, ma Apeteniko. Na vala'au le tupu, ma lona to'asā tele, ina ia tutū mai le to'atolu i ōna luma, ma a'o ia fa'asino i le afi 'a'asa sa ia ta'u atu le fa'asalaga o le a o'o i ai pe a lē usita'i i lana fa'atonuga.

Peita'i e le'i mafai ona fa'aliliu'ese nei talavou amio fa'atamāli'i mai lo latou fa'amaoni i le Pule aoao o malō uma. Sa a'oa'oina i latou mai le tala'aga o a latou tua'ā, o le lē usiusita'i o le lē fa'amamaluina lea o le Atua, e o'o ai i faigatā ma le malaia. A o le mata'u i le Ali'i o le amataga lea o le poto ma le fa'avae o manuia uma. Sa vā'ai latou ma le filemū i le afi 'a'asa ma le motu o tagata ifo i tupua. O latou e fa'atuatua pea i le Atua, o le a Ia lē tu'ulafoā'i i latou i se taimi fa'apenei. Na latou tali atu ma le fa'aaloalo ma le matuā mautino ato'atoa, "Ia e silafia e 'oe le tupu e, matou te lē 'au'auna i ōu atua; o le tupua auro fo'i ua e fa'atūina, matou te lē ifo i ai" (Tanielu 3:18).

Na si'omia le tupu e āna ta'ita'i maualuluga, o ali'i o le malō, ma fitafita o malō na ia fa'ato'ilalo; sa fa'aeaina ia e tagata popoto uma ona o le poto ma le malosi o atua. A o i totonugalemū o lea va'aiga, o lo'o tula'i mai ai talavou Iutaia, ma o tete'e pea i le poloa'iga a le tupu. O latou e usiusita'i i tulafono a Papelonía pe a lē fete'ena'i ma fetalaiiga a le Atua, peita'i e lē liliu'ese i latou mai lo latou tiute i Lē na faia i latou.

E le'i fa'atuā'oa le to'asā o le tupu. Ua i ai nei o ia i le tumutumu o lona malosi ma le mamalu, a e ua tū tete'e mai sui o le malō 'inosia o Iutaia, o se mea matuā fa'atigā lea i lona loto mitamitavale ma ua ia lē mafai ona lavātia. Sa lafoina nei pagotā Iutaia i totonu o le ogāumu afi e sautuafitu lona vevela, a e ona o le 'a'asa o le afi na fa'aumatia ai ē sa lafoina i latou i totonu.

I le Fa'atasi ai o le Atua Soifua

Sa fa'afuase'i ona sui foliga o le tupu ona ua ia matuā fefe lava. Ua pupulataula'i lana va'ai ma sa lē to'esea mai le afi mumū, ua liliu atu i āna ta'ita'i ma fa'apea atu, "Pe na tatou lē lafoina ea tagata e to'atolu o fusifusia i totonu o le afi?" O le latou tali, "Le tupu e, sa fa'apea lava" (Tanielu 3:24). Na fa'apea mai loa le tupu, "Fa'auta, ua 'ou iloa tagata e to'afā, ua tatalaina, ua feoa'i i totonu o le afi, ua lē afāina lava i latou; ua tino mai lona to'afā ua pei o se Ālo o le Atua" (F. 25).

Pe a fa'aalia e Keriso Ia lava i le fanua a tagata, o le a fetalai se mana e lē mava'aia i o latou agaga. Latou te lagona le fa'atasi ai o le Atua ma i latou. E tetemū tupu ma ali'i i luma o Lona mamalu, ma latou fa'aailoa atu o le Atua soifua e aupito maualuga lea i lo o pule uma fa'alelalolagi.

Sa lagona e le tupu le masiasi ma le salamō, ona ia fa'apea atu lea, "O 'au'auna a le Atua silisili, ō mai ia, inā ō mai" (Tanielu 3:26). Na latou usiusita'i i le fa'atonuga, ma ua ō mai i luma o le motu o tagata, e le'i i ai se fa'aailoga o le afi i o latou lavalava. Na aumaia e lenei vavega se suiga i mafaufau o tagata ma ua galo iā i latou le tupua auro sa fa'atūina ma se fa'aaliga ofoofogia. Sa faia loa e le tupu le poloa'iga e fasiotia so'o se tasi e fai 'upu e tete'e ai i le Atua o nei talavou Iutaia, "auā e leai se isi Atua na te mafaia ona lavea'iina fa'apenā." (F. 29).

Tūmau i le Lelei ma le Olaga Fa'apa'iaina

O nei talavou Eperu e to'atolu sa fa'aalia mai e iā i latou le fa'apa'iaina moni. O le a lē taofia le ta'iala a le Kerisiano fa'amaoni se'i fuatia po o ā i'uga. E lē fesili po o le ā le manatu a tagata pe a 'ou tago e fai lea mea? Pe o le a afāina fa'apefea lo'u olaga fa'alelalolagi pe a 'ou faia lea mea? Ia matuā naunauta'i le fanau a le Atua ia iloa Lona finagalo i le mea e tatau ona latou faia, ina ia fa'amamaluina o Ia i a latou galuega. Ua faia e le Ali'i mea uma ina ia mafai ona pulea e Lona alofa tunoa loto ma olaga o Ōna so'o uma, ina ia 'avea latou o molī e susulu ma fa'amalamalamaina ai le lalolagi.

O nei tama Eperu fa'amaoni e matuā agava'a lava, ma e iā i latou le atamai e aupito maua luga ma e i tulaga fa'aaloalogia o le taimi nei; peita'i e ui i nei mea uma, a e latou te le'i fa'agaloina ai le Atua. O lo latou malosi sa gaua'i atu i le mana tosina o le alofa tunoa o le Atua, ma e ala i le mautū o lo latou uiga fa'amaoni, sa latou fa'aalia lea i vi'iga o Ia Lē na vala'auina i latou mai le pogisā a e ūlu atu i Lona malamalama ofoofogia. Ina ua laveā'iina i latou i luma o lea fa'apopotoga e mata'utia le to'atele, sa va'aia ai le mana ma le mamalu o le Atua. Na tula'i mai Iesu lava ia i o latou tafatafa i totonu o le ogaūmu 'a'asa, ma e ala i le mamalu o Lona fa'atasi ai, sa iloa mautinoa ai e le tupu o Papelonía e lē o se tasi lea a e na o le Ālo o le Atua. O le malamalama o le lagi sa fa'asusulu mai iā Tanielu ma āna uō, se'ia o'o ina malamalama uma o latou soa e fa'atatau i le fa'atuatua e fa'aeaina ai o latou olaga ma fa'amatagofie ai o latou uiga. E ala i le laveā'iina o Āna 'au'auna fa'amaoni, ua fa'aailoa mai ai e le Ali'i o le a Ia tula'i ma ē sauāina ina ia fa'ato'ilalo pule fa'alelalolagi uma e taumafai e solipala le puleaga a le Atua o le lagi.

A'oa'oga mo Lē Loto Vaivai

O se a'oa'oga ua tu'u mai nei i lē e loto vaivai, e lē mautonu, e loto pala'ai, e lē to'a i ala lelei a le Atua, a e o se fa'amalosia'aga iā i latou o ē o le a lē fulitua mai tiute ona o faigatā po o mea e tau fa'amata'u mai. O nei uiga fa'amaoni ma le tumau ua tu'u mai o se fa'ata'ita'iga o le ola ua fa'apa'iaina; a e leai so latou manatu e fa'aailoa mai o latou e matuā tāua lava. O le aofa'i o le lelei atonu na faia e Kerisiano fa'amaoni e lē mafai ona faia se fa'atatau se'ia o'o ina fa'aailoa i tusiga o le olaga pe a nofoia le fa'amasinoga ma tatalaina tusi.

E fa'aalia mai e Keriso Lona agaga fiafia i lea vaega o tagata; Na te ta'u i latou o Ōna uso. E tatau ona i ai se tau selau o i tatou i le mea o lo'o i ai nei se to'atasi, ia soso'o felāta'i atu i le Atua, o latou olaga e matuā mausalī i Lona finagalo, o le a 'avea ai i latou o malamalama e susulu ma pupula atu, o ē fa'apa'iaina ato'atoa i le loto, le tino, ma le agaga.

O lo'o alu pea le fete'ena'iga i le vā o le fanau a le malamalama ma le fanau a le pōuliuli. E tatau iā i latou uma o ē ta'uta'u le suafa o Keriso ona fa'ate'a 'ese le tulaga tautulemoe o lo'o fa'avaivaiina ai le uiga fia taumafai, a e ia tula'i e fetaia'i ma tiute tāua e o'o mai i o latou luga. O i latou e faia fa'apea, atonu o le a fa'aalia iā i latou le mana o le Atua. O le Ālo o le Atua, le Fa'aola o le lalolagi, o le a fa'aailoaina mai i a latou 'upu ma a latou galuega.

.

E pei o ōna pō o Sataraka, Mesako, ma Apeteniko, e fa'apea fo'i aso fa'ai'u o le tala'aga o le lalolagi o le a matuā galue le Ali'i mo i latou o lo'o tutūmau mo le mea moni. O le tagata e savali fa'apei o talavou Eperu i totonu o le ogaūmu 'a'asa o le a fa'atasi ma ē mulimuli iā te Ia i so'o se mea o lo'o i ai. O le a fa'amalosia ma fa'amafanafanaina i latou i Lona fa'atasi ai. I totonugalemū o le taimi o fa'afitāuli - o faigatā e le'i tupu muamua talu ona i ai se malō - o le a tūmau pea Lana 'au filifilia. O Satani ma āna 'au amioleaga uma o le a lē mafai e latou ona fa'aumatia sē e aupito vaivai o le 'au pa'ia a le Atua. O le a puipuia i latou e agelu e pito sili le malolosi, ma o le a fa'aali mai le Ali'i o Ia o le "Atua o atua," e mafai ona fa'asao i latou o ē fa'atuatua iā te Ia. (*Perofeta ma Tupu, p. 513*).

O Tanielu i le Lua o Leona

Matā'upu 5

Ina ua nofoia e Tariu le nofoāli'i o Papelonia, na ia sauni loa e toe fesuia'i le malō. Na ia "tofia ē pule i le malō o ali'i sili e tasi le selau ma le to'aluafulu, latou te i ai i le malō uma lava. Ua tofia fo'i ali'i silisili e to'atolu, ua i ai Tanielu; latou te pule i ia ali'i sili" (Tanielu 6:1, 2). Ma "ua sili lenei Tanielu i ali'i silisili ma ali'i sili, ina ua tele lona atamai, sa manatu fo'i le tupu ia tofia o ia e pule i le malō uma" (F. 3). Sa oso le matau'a i loto o le 'au ta'ita'i o le malō ina ua fa'atūina Tanielu i tulaga mamalu. Na sa'ili e nei ali'i ma pule se mafua'aga ina ia aumai ai se faitiōga e tete'e ai iā te ia. "A ua lē maua e i latou se mea e fa'alani ai po o se mea leaga e tasi; auā sa fa'amaoni o ia, ua lē maua fo'i sona sesē e tasi, po o se mea leaga" (Tanielu 6:4).

O se fa'aa'oa'oga lenei ua tu'u mai mo Kerisiano uma. Sa tumau pea i aso ta'itasi foliga o le matau'a i luga o Tanielu; sa ati ma le ma'ai la latou va'ai ona o le 'ino'ino; e ui i lea na leai se 'upu po o se gaoioiga o lona olaga na mafai ona fa'aalia mai ai se sesē. Ma e na te lē fa'ailoa se tulaga ua fa'apa'iaina; peita'i na faia e ia le mea e sili atu le lelei - na ola o ia i se olaga e fa'amaoni ma e fa'apa'iaina.

Sa fa'atumulia fili o Tanielu i le ita ona latou te le'i mafai ona maua se pona i lana amio po o se sesē i lana galuega ia fa'avae ai se faitiōga e tete'e ai iā te ia. "Ona fa'apea atu ai lea o ia tagata, E lē maua e i tatou se mea leaga i lenei Tanielu, pe afai tatou te lē maua se mea iā te ia i le tulafono a lona Atua" (F. 5). E fa'atolu i le aso ona tatalo Tanielu i le Atua o le lagi, ma e na o lenei le faitiōga sa mafai ona latou aumaia e tete'e ai iā te ia.

Ua faia loa nei se latou fuafuāga ia taunu'u ai ona fa'aumatia o ia. Sa fa'apotopoto ōna fili ma latou ssa'ili ina ia faia se tulafono e le tupu e fa'asāina ai le malō atoa ona fai se talosaga mo se mea i le Atua po o se tagata, a e vaganā ai le tupu o Tariu, mo le tolusefulu (30) aso, ma o se isi e lē usita'i i lenei fa'atonuga e tataua ona fa'asala i le lafoina i le lua o leona. E le'i iloa e le tupu e uiga i le ino'ino o ia ali'i iā Tanielu, ma e le'i mātēa e ia o le pogai o le poloa'iga ina ia fa'aumatia ai Tanielu. E ala i uiga taufa'ase'e sa latou fa'asesē le tupu ia talitonu o lea tulafono ua faia ia fa'amamaluina ai ia. Sa tu'umuli latou mai luma o le tupu ma ua fa'afiafiaina ona o le mailei ua mafai ona latou fafauina mo le 'au'auna a le Atua.

Se Fa'aa'ao o le Lotomau ma le Uiga Agatonu

Ua alu le poloā'iga mai le tupu; e masani fo'i Tanielu i fuafuāga uma a ōna fili ia fa'aleaga iā te ia. Peita'i e le'i mafai ai ona suia ōna uiga masani e se mea e tasi. Na ia fa'asaga e fai ma le filemū lona tiute e pei ona masani ai, ma i le itulā e tatalo ai, ua alu i lona afeafe, tatala fa'amalama aga'i i Ierusalemā, ma fai āna talosaga i le Atua o le lagi. Ona ua uia lea ala, na ia fa'ailoa atu ai e leai lava se mea fa'alelalolagi e mafai ona tū mai i le vā o ia ma lona Atua, pe ta'u iā te ia po o ai e tataua pe lē tataua ona ia tatalo i ai. Oi le tagata e fa'amaoni i ta'iala! ua ia tū i luma o le lalolagi i lenei aso, e fai ma fa'aa'oa'o e ōnovi'ia, o le Krisiano e lē fefe ma e usiusita'i fa'amaoni. E liliu o ia i le Atua ma lona loto atoa, e ui ina ua iloa o le oti le fa'asalaga mo lona uiga fa'amaoni.

Sa mātā'i pea Tanielu e ōna fili i le aso atoa; e fa'atolu ona ia tu'umuli i lona afeafe, ma e fa'atolu ona latou fa'alogoia le leo o le tatalo fa'atauānu. I le taeao na soso'o ai ua faia loa le faitiōga i le tupu ona ua lē usita'i le pagotā Iutaia, o Tanielu, i lana poloa'iga. Ina ua fa'alogole tupu i nei 'upu, sa matala ōna fofoga ma ia iloa ai le mailei ua uma ona fafauina. Sa matuā fa'anoanoa o ia ona ua fa'atagaina lenei tulafono, ma na galue e fai se fuafuāga atonu o le a mafai ai ona lavea'iina Tanielu. Peita'i sa ō mai fili o le perofeta i luma o le tupu ma nei 'upu, "Le tupu e, ia e silafia le tulafono a Metai ma Peresia, e le tālaina lava se vavao, po o se tulafono ua fa'amauiina e le tupu" (Tanielu 6:15).

"Ua fai atu le tupu, ona latou ta'ita'iina ane ai lea o Tanielu, ua lafo iā te ia i le lua o leona.... Ua au mai fo'i le ma'a, ua tu'u ai i le gutu o le lua, ona fa'amaufa'ilogaina lea e le tupu i lana mama, atoa ma le mama a

ali'i sa iā te ia, ina ne'i liua le pule iā Tanielu. Ona alu atu lea o le tupu i lona maota ua lē taumafa ia i lea po; e leai fo'i ni la'aupese na avane i ona luma, ma ua te'a iā te ia le moe" (F. 16-18).

"Ua Auina mai e Lo'u Atua Lana Agelu"

I le taeao pō lava, ua usu fa'avavave le tupu i le lua o leona, ma 'alaga, "Tanielu e, le 'au'auna a le Atua soifua, ua mafai ea e lou Atua, o Lē ua e 'au'auna i ai e lē aunoa, ona lavea'i iā te 'oe ai leona?" (F. 20). Na ia fa'alogoina le leo o le perofeta ina ua tali mai, "Le tupu e, ia soifua 'oe e fa'avavau, ua 'auina mai e lo'u Atua o Lana agelu, ua punitia ai gutu o leona, ua lē afāina ai a'u; auā ua silafia e Ia ua leai sa'u amio i Ōna luma; e leai fo'i se mea leaga ua a'u faia i ōu luma, le tupu. Ona fiafia tele lea o le tupu ona o ia, ua ia fetalai atu ia 'aveina a'e Tanielu ai le lua; ona 'aveina a'e ai lea o Tanielu ai le lua, ua lē afāina lava o ia, auā na ia fa'atuatua i lona Atua" (F. 22-23). Sa fa'apea ona lavea'iina le 'au'auna a le Atua. O le mailei sa fausia e ōna fili ia fa'aumatia ai ia, na 'avea ma ala o lo latou lava fa'aumatiāga. Mai le fa'atonuga a le tupu, sa lafoina i latou i le lua, ma sa vave ona fa'aumatia latou e manu fe'ai.

O Tatalo a Tanielu

Matā'upu 6

Ua lata i le fa'ai'uga o le fitusefulu (70) tausaga talu ona 'ave o ia fa'apagotā, a ua fa'agaioiina le mafaufau o Tanielu e fa'atatau i valo'aga a Ieremia. Sa iloa e ia ua lata mai le taimi e tatau ona toe tofotofoina ai e le Atua Ōna tagata filifilia. Ua anapogi ia, ma le loto fa'amaulalo sa tatalo ma ia ōle atu pea i le Atua o le lagi mo le manuia o Isara'elu, i nei 'upu: "Le Ali'i e, o le Atua e sili ma le mata'utia, o Lē tausī i le feagaiga, ma le alofa i ē alofa atu iā te Ia, atoa ma ē o tausiusi i Āna poloa'iga. Ua matou agasala, ma ua fai mea leaga, ma ua matou agaleaga, ua fouvale fo'i ina ua te'a 'ese ma Āu poloa'iga ma Āu fa'amasinoga. E le'i fa'alogi i matou i Āu 'au'auna le 'au perofeta, o ē na tautala mai i Lou suafa i o matou tupu, ma o matou ali'i, ma o matou tamā, atoa fo'i ma tagata uma o le nu'u" (Tanielu 9:4-6).

E le'i fa'ailoa atu e Tanielu sona ia lava fa'amaoni i luma o le Atua, lē ta'u atu o ia e mamā ma pa'ia. Peita'i o lenei perofeta sa fa'amamaluina ua ta'u atu ia fa'atasi ma tagata e matuā agasala lava o Isara'elu. O le poto na tu'u e le Atua i lenei 'au'auna sa aupito sili ona maoa'e i lo le tomai o tagata maua'ululuga o le lalolagi, e pei o le pupula o le lā ona susulu i le vānimonimo i le aoauli e sili atu le malamalama i lo o le fetū e pito itiiti. Se'i tatou manatunatu loloto i le tatalo mai le agaga o lenei tagata e matuā fīafia i ai le lagi!

Ma le loto fa'amaulalo lava, ma loimata mai le loto ua matuā tigā, na ia ōle atu mo ia lava ma ōna tagata. Na ia fa'amafola atu lona agaga i luma o le Atua, ta'u atu lona lē aogā ma fa'ailoa atu le maoa'e ma le mamalu o le Ali'i.

Fa'atauānau ma le Naunauta'i

O āna talosaga e matuā fa'atauānau ma e tu'u atu ma lona naunauta'i. Sa 'a'apa atu le 'a'ao o le fa'atuatua e u'umau folafolaga e lē gata a le Silisili 'Ese. O lona agaga sa tigā ma mafatia, a e na ia iloa ua fa'afofoga lana tatalo ma ua iā te ia le manumalō. Pe afai e tatou te tatalo fa'apei o Tanielu, fa'atigā e pei ona ia tigā, ma ia fa'amaulalo i luma o le Atua, e tatau loa ona tatou iloa ua talia a tatou talosaga e pei ona tu'uina iā Tanielu. Se'i fa'alogi o lana ōlega na ia tu'u atu i maota o le lagi:

"Lo'u Atua e, ia e liliu mai Ōu fofoga, ma fa'afofoga mai; ia sisila mai Ōu fofoga, ma e silasila mai i lo matou fa'atafuna'ina, atoa ma le 'a'ai ua fa'aigoa i Lou suafa; auā matou te lē avatu lo matou 'ai'oi i Ōu luma ona o a matou amiotonu, a o Lou alofa tele. Le Ali'i e, ia e fa'afofoga mai. Le Ali'i e, ia fa'amagalo mai. Le Ali'i e, ia e fa'asagasaga mai, ma e faia lava; 'aia le fa'atuatua, ona o Lau afio lava, lo'u Atua e, auā ua igoa i Lou suafa Lau 'a'ai ma Lou nu'u" (Tanielu 9:18, 19).

Sa tatalo le tagata o le Atua mo fa'amanuiāga a le lagi i luga o Ōna tagata ma ina ia iloa manino Lona finagalo. O le 'avega a lona lot sa mo Isara'elu, o latou o ē sa lē tausia le tulafono a le Atua. Sa iloa e ia o mea leaga uma ua o'o i o latou luga talutalu le lē usiusita'i i Lana tulafono pa'ia. Ua fa'apea ia, "Ua matou agasala, ua matou amio leaga.... Auā o a matou agasala, ma amiolētonu a o matou tamā ua 'avea ai Ierusalemā atoa ma Lou nu'u ma luma e i latou uma o ē vagavagai mai iā te i matou" (F. 15, 16). Ua alu'ese mai iā Iutaia lo latou tulaga fa'apitoa ma pa'ia, o tagata filifilia latou a le Atua. "O lenei, lo matou Atua e, ia e fa'afofoga mai i le tatalo a lau 'au'auna, atoa ma āna fa'atoga, ma ia malamalama atu Ōu fofoga i Lou malumalu ua fa'atafuna'iina" (F. 17). Sa faliu le loto o Tanielu ma le matuā naunauta'i lava i le malumalu ua fa'atafuna'iina o le Atua. Na iloa e ia o lona tamā'o'aiga e mafai ona toe fa'afō'isia mai pe a toe salamō Isara'elu mai le latou solia o le tulafono a le Atua, ma 'avea i latou o tagata e fa'amaoni, loto fa'amaulalo, ma e usiusita'i.

O le 'Ave Fe'au Mai le Lagi

A o tatalo Tanielu, na alu ifo mai maota o le lagi le agelu o Kaperielu, e ta'u iā te ia ua lagona ma taliina āna talosaga. Sa fa'atonuina lenei agelumamana e tu'u iā Tanielu le agava'a ma le malamalama - ia fofola i ōna luma mea lilo o i lumana'i. O lea, a o sa'ili Tanielu ia matuā iloa ma malamalama i le 'upu moni, na aumaia o ia i se so'otaga tāua ma le 'avefe'au a le lagi.

Na maua e Tanielu mai le tali o lana tatalo le malamalama ma le 'upu moni sa ia mana'omia fa'apea ma ōna tagata, ma sa iloa ai se va'aiga o mea tetele o le a tutupu i lumana'i, se'ia o'o i le afio mai o le Fa'aola o le lalolagi. O i latou o ta'u mai ua fa'apa'iaina a e latou te lē o naunau e sa'ili Afioga Pa'ia po o fete'ena'i ma le Atua i le tatalo ina ia malamalama manino i i le 'upu moni, e lē o iloa le uiga o le fa'apa'iāga moni.

Na talanoa pea Tanielu ma le Atua, ma sa tatala mai le lagi i ōna luma. O tulaga mauululuga na tu'u iā te ia sa maua ona o le loto mauulalo ma le sa'ili ma le fa'amaoni. O latou uma e talitonu mai le loto i le afioga a le Atua o le a matelāina i le fia iloa o Lona finagalo. O le Atua o le pogai o le 'upu moni, e na te fa'amalamalamaina le poto e pogisā ma tu'u i le mafaufau o le tagata le malosi e taofimau ai ma iloa 'upu moni ua Ia fa'aali mai.

Sa'ili le Poto Mai le Atua

Mai lenei mea na tupu, sa tu'u ai e le agelu o Kaperielu iā Tanielu fa'atonuga uma na mafai ona ia maua. Ua mavae nai tausaga a e ua naunau lava le perofeta ia na iloa nisi mea e le'i ato'atoa ona fa'amatalaina, ma na sauniuni lava ia e sa'ili pea le malamalama ma le poto mai le Atua. "O ōna pō ia, o a'u o Tanielu sa 'ou fa'anoanoa ai i vaiasosā ato'atoa e tolu; e leai se mea lelei na a'u 'ai ai, e leai fo'i se 'a'ano o manu, po o se uaina na o'o i lo'u gutu, na 'ou lē ū'u ai lava,...Ona a'u tepa a'e lea ma 'ou va'ai, fa'auta fo'i, o le tasi tagata ua 'ofu i le 'ie lino, ma ua fusi lona sulugātiti i le auro lelei o Upasa. O Lona tino fo'i ua pei o le tasesa lea, ma Ōna fofoga ua tino mai pei o le uila, ma Ōna mata ua pei o lamepa mumū ia, o Ōna lima fo'i ma Ōna vae ua pei o 'apa memea ua fa'apupulaina, o le si'ufofoga o Lana fetalaiga ua pei o le ta'alili o le vao tagata e to'atele" (Tanielu 10:2-6).

O lenei fa'amatalaga e tai tutusa ma lea sa tu'uina mai e Ioane ina ua fa'aalia Keriso iā te ia i le motu o Patamo. E lē o se isi lava a e o le Ālo o le Atua na fa'aalitino iā Tanielu. O lo tatou Ali'i na afio ifo ma se tasi 'avefe'au fa'alelagi e a'oa'o Tanielu e fa'atatau i le mea o le a tupu i aso o le i'uga.

O 'upu moni tāua o lo'o fa'aalia mai e le Fa'aola o le lalolagi e mo i tatou o ē sa'ili mo le 'upu moni e pei o 'oloa ua nātia. Ua tausagā ma ua matua Tanielu. Sa i ai ia i lona olaga atoa i le maota fa'apaupau i totonugalemū o mea fa'afiafia ma va'aiga fa'atosina, o lona mafaufau sa mamafa ma fa'atumulia i matā'upu o le malō tele. Peita'i sa liliu'ese pea ia mai nei mea uma ina ia tū fa'amaulalo i luma o le Atua, ma sa'ili ia malamalama i fuafuāga a le Silisili 'Ese. Ina ua tali āna talosaga, na fa'afeso'ota'i mai i le malamalama mai maota o le lagi, mo i latou o le a ola i aso o le i'uga. E tataua ea ona tatou fa'amaoni e sa'ili le Atua ina ia tatou iloa ai ma malamalama i 'upu moni o lo'o aumai iā i tatou mai le lagi? "E tataua i lē alu atu i le Atua ona talitonu o lo'o soifua o Ia, o Ia fo'i na te tauia mai o ē matuā sa'ili iā te Ia" (Eperu 11:6).

"A ua na o a'u lava o Tanielu na iloa le fa'aaliga; auā o tagata sa matou i ai na lē iloa e i latou le fa'aaliga, a ua o'otia i latou i le tetemū tele lava, na latou sosola fo'i ia lalafi ai i latou.... ona leai lea o se toe malosi iā te a'u; ua mavae lo'u matagofie, ua 'ou pulavale, ua leai lava se malosi ua toe iā te a'u" (Tanielu 10:7, 8). O i latou uma o ē ua fa'apa'iaina moni o le a lagona fa'apitoa fa'apea. O le a latou va'aia lo latou tulaga vaivai ma le lē ato'atoa ona ua manino i a i latou le maoa'e, le mamalu, ma le ato'atoa o Keriso. O le a leai so latou malosi e mafai ai ona fa'ailoa mai o latou e leai se uiga agasala; o le mea e foliga mai e tonu ma lelei e na ona fa'ailoa mai e lē aogā ma e palagofie pe a fa'atusatusa atu i le tulaga mamā ma le mamalu o Keriso. O le taimi pe a vavae 'ese le tagata mai le Atua, pe a ua matuā lē manino ana va'aiga o Keriso, ona latou fa'apea ai lea, "O a'u e lē agasala; o a'u ua fa'apa'iaina."

Ua toe fa'aali mai Kaperielu iā Tanielu ma fa'apea mai iā te ia: "Tanielu e, o le tagata ua alofateleina, ia e mafaufau i 'upu 'ou te fai atu ai iā te 'oe, ma ia e tū i luga; auā ua 'auina mai nei a'u iā te 'oe. Ua uma ona fetalaia mai iā te a'u o nei 'upu, ona 'ou tū ai lea, ua 'ou gatete. Ona fa'apea mai ai lea o ia iā te a'u, Tanielu e, 'aua le

fefe; auā talu le lua'i aso na e sauni ai lou loto e mafaufau ma fa'atigāina 'oe e 'oe i luma o lou Atua, sa fa'afofogaina āu 'upu, ua a'u sau fo'i ona o āu 'upu" (F. 11, 12).

Ua Fa'amamaluina Tanielu

Oi se fa'aaloaloga e matuā maoa'e na fa'aalia iā Tanielu e le Mamalu silisili'ese o le lagi! Na Ia fa'amafanafana Lana 'au'auna ma ta'utino iā te ia ua fa'alogoina lana tatalo i le lagi. Ina ua taliina lea tatalo fa'atauānau, sa 'auina ifo le agelu o Kaperielu ia sui afāina ai le loto o le tupu Peresia. Na tete'e le tupu i osofa'iga a le Agaga o le Atua a o anapogi ma tatalo Tanielu mo vaiaso e tolu, peita'i sa 'auina mai le Ali'i o le lagi, o Mikaele le Agelu silisili, e suia le loto ma'a'a o le tupu ina ia fa'agaoioi e tali le tatalo a Tanielu.

"Ua ia fetalai mai na 'upu iā te a'u, ona 'ou fa'asaga lea o'u mata i le 'ele'ele, ua 'ou lē magagana. Fa'auta fo'i, o le tasi e pei se tagata ua pa'i mai i o'u laugutu.... Ua fa'apea mai o ia, O 'oe o le tagata ua alofateleina, 'aua e te fefe, ia e manuia, ia e fa'amalosi, ia e fa'amalosi lava. Ua mavae mai lana fetalai iā te a'u, ona 'ou malosi ai lea, ma a'u fa'apea atu, Inā fetalai mai ia lo'u ali'i; auā ua e fa'amalosi mai iā te a'u" (F. 15-19). Sa mata'utia le mamalu fa'alelagi ua fa'aalia iā Tanielu ma na lē mafai e ia ona lavātia lea va'aiga. Ua punitia e le 'avefe'au le pupula o lona fa'atasi ai a e fa'alia o ia i le perofeta "ua tino mai pei se tagata" (F. 16). E ala i lona mana fa'a-Atua sa ia fa'amalosi i lenei tagata uiga lelei ma le fa'atuatua ina ia lagona le fe'au ua 'auina mai e le Atua iā te ia.

O Tanielu o se 'au'auna fa'amaoni a Lē Silisili 'Ese. O lona olaga atoa sa fa'atumulia i galuega lelei mo lona Matai. O lona uiga mamā ma le fa'amaoni sa mautū ma e tulaga tutusa lava i lona loto fa'amaulalo ma le salamō i luma o le Atua. E toe fa'apea atu, o le olaga o Tanielu o se ata manino lea o le fa'apa'iāga moni.

O le Amio a Ioane

Matā'upu 7

O le aposetolo o Ioane sa iloga 'ese lava ia e sili a'e i isi o ōna uso na ta'ua o le "so'o na alofaina e Iesu." E ui e lē i ai se uiga fefe, vaivai, po o le femoumoua'i i lana amio, na iā te ia le uiga e agalelei ma le loto alofa. E foliga na iā te ia le fiafia i se uiga maoa'e, o le uiga o se uō mafanafana a Keriso, ma sa ia maua le tele o fa'aailoga o le talitonuina ma le alofa o le Fa'aola. O ia o se tasi o le to'atolu na fa'atagaina e molimauina le mamalu o Keriso i le mauga o le liliuina, ina ua fa'aalia Lona mamalu ma Lona puapuagā i Ketesemane, ma Lona fa'atuatūaga i le tu'uina iā Ioane o le tausiga o Lona tinā i itūlā mulimuli a o mafatia o Ia i luga o le satauro.

O le alofa o le Fa'aola mo le so'o ua peleina na toe fo'i mai ma le malosi ato'atoa o le alofa e matuā fa'amaoni lava. Na pipi'imaui Ioane iā Keriso e pei o le vine ona pipi'i atu i le la'au e sosolo ai. Mo lona Matai na ia loto tele ai lava i taimi o faigatā i le maota o fa'amasinoga ma na tū fa'atalitali e latalata ane i le satauro. Ma ina ua o'o mai tala fiafia ua toe tū a'e Keriso, na ia fa'avave atu i le tu'ugamau, ma i lona oli'oli tele sa momo'e fa'avave atu ai ma sa muamua taunu'u i lo o Peteru i le tu'ugamau.

O le alofa o Ioane mo lona Matai e lē na o se alofa o masaniga fa'aletagata, peita'i o le alofa o le tagata agasala ua salamō, ua lagona ua togiolaina ia e le toto tāua o Keriso. Na ia fa'atāuaina i le fa'aaloalo e aupito maua luga le galue ma le onosa'i i le galuega a lona Ali'i. O lona alofa mo Iesu na ta'ita'iina ai o ia ia alofa iā i latou uma na malie ai Keriso. O lana tapuā'iga o le alofa e fa'atinoina. Sa ia manatu o le alofa i le Atua e fa'aailoa i le alofa i Lana fanau. Sa fa'aloga pea ia o fa'apea mai, "Le 'au pele e, afai ua fa'apea ona alofa mai o le Atua iā te i tatou, e tataui ai ona tatou fa'atagata....Ua tatou alolofa iā te Ia, auā na Ia mua'i alofa mai iā te i tatou. Pe afai e fa'apea mai se tasi, 'Ou te alofa i le Atua, a e ita i lona uso, o le pepelo lava ia; auā o lē lē alofa i lona uso ua ia va'ai atu i ai, pe mafai fa'apefa ona alofa o ia i le Atua ua ia lē va'ai atu i ai" (I Ioane 4:11, 19, 20). O le olaga o le aposetolo na ō gatasi ma āna a'oa'oga. o le alofa na mumū mai lona loto mo Keriso, na ta'ita'iina ai o ia ina ia tu'uina atu le mea sili, e galue ai ma le lē fa'avaivai mo ona uso ā tagata, a e maise ōna uso Kerisiano. O ia o se fa'ailoga malosi, e naunauta'i, ma e matuā fa'amaoni, ma o ana 'upu e tāua ma e tu'u atu ai le fe'au e liua ai le loto.

O le Tagata Fou e Ala i le Alofa Tunoa

O le alofa fa'amoemoeina ma le agaga e lē alofa fa'apito na fa'aailoa i le olaga ma le amio a Ioane e aumai ai a'oa'oga e lē mafai ona fa'amatalaina i le tāua mo le ekalesia Kerisiano. E i ai nisi e fa'apea o lo'o iā i latou lenei alofa e aunoa ma le alofa tunoa fa'ale-Atua; peita'i o Ioane, o lona ia lava uiga moni, sa i ai uiga sa matuā ponā ai lana amio; sa mitamitavale ma fiasili, sa vave ona ita ma mana'o e tau'i ma sui.

O le loloto ma le fa'amaoni o le alofa tele o Ioane mo lona Matai e lē o le mafuaga lenā o ke alofa o Keriso mo ia; a e o le uiga o lona alofa ona ua fa'anaunau Ioane ina ia 'avea o ia ia pei o Iesu, ma e i lalo ifo o le gaoioiga e suia ai ona o le alofa o Keriso, ma na 'avea ai o ia o sē e agamalū ma loto maua lalo. Sa nātia ia lava iā Iesu. Na feso'ota'i vavālalata ma le Vine Ola, ma na 'avea ai o sē tasi ua 'au ai i le uiga moni fa'ale-Atua. O le i'uga lenā o le mafutaga ma Keriso. O le fa'apa'iaina moni lenā.

Atonu e tele fa'aailoga o pona i le amio a se tasi, peita'i e o'o ina 'avea ma so'o moni o Iesu, o le mana o le alofa tunoa o le Atua e 'avea ai o ia o se tagata fou. O le alofa o Keriso e suia ma fa'apa'iaina ai o ia. Peita'i afai e na ona fa'apea tagata o latou o Kerisiano, ma o a latou tapuā'iga e lē 'avea ai i latou o ali'i ma tama'ta'i e sili atu i tauālumaga uma o le olaga, - e ola o sui o Keriso i masaniga ma amio - e lē ā Keriso i latou.

Lesona mo le Fausia o le Amio

O se taimi na aofia ai Ioane i se finauga ma nisi o ōna uso po o ai o i latou e ta'ua e sili. Latou te le'i manatu o ā latou 'upu o le a lē lagona e le Matai; peita'i na faitauina e Iesu o latou loto ma maua ai le avanoa e tu'u atu ai i Ōna so'o le lesona o le loto maulalo. E lē na o le vaega to'aitiiti lenei na fa'alologologo i Āna 'upu, a e ua tusia mo le manuia o i latou uma o ē mulimuli iā te Ia i le taimi o le i'uga. "Ua nofo Ia i lalo, ona vala'au atu lea i le to'atinoagafulu ma le to'alua, ua fetalai atu iā te i latou, Afai e fia muamua se tasi, e 'avea o ia ma mulimuli i tagata uma, ma 'au'auna a tagata uma" (Mareko 9:35).

O i latou e i ai le agaga o Keriso o le a leai se agaga fiasili ina ia maua se tulaga e maua'uga a'e i o latou uso. O i latou ia o ē fa'atauva'a le va'ai iā i latou lava, o i latou ia o le a ta'ua e sili i le silafaga a le Atua. "Ona tago lea o ia i le tama itiiti, ua fa'atū iā te ia i o latou luma; ua na si'itia o ia i Ōna lima, ona fetalai atu lea ia te i latou, 'Ai sē talia se tama itiiti fa'apenei i Lo'u nei igoa, ua talia e ia o A'u; ai se talia A'u, e lē o A'u ua ia talia, a o Ia na 'auina mai A'u'" (F. 36, 37).

O se a'oa'oga tāua tele mo i latou uma o ē mulimuli iā Keriso! O i latou o ē va'ai māmā i tiute o le olaga o lo'o ta'atia mai tonu i o latou auala, o ē fa'atalalē i le alofa, agalelei, ma le fa'aaloalo, e o'o lava ise tamaitiiti, ua latou lē amana'ia Keriso. Na lagona e Ioane le tāua o lenei a'oa'oga ma na fa'amanuiaina ai o ia.

O se tasi aso na va'aia ai e ia ma lona uso o Iakopo se tagata o lo'o tutuli temoni i le suafa o Iesu, ma e talia i e le'i feso'ota'i o ia ma la latou fa'apotopotoga, sa latou filifili ai e lē o iā te ia le aiā e fai ai lenei galuega, ma sa fa'asāina ai o ia. I lona loto fa'amaoni ua ta'u atu e Ioane lenei mea na tupu i lona Matai. Na fetalai atu Iesu, "Aua le vaoia o ia; auā e leai se tagata na te faia se vavega i Lo'u nei igoa, na te mafaia ona vave tautala i se 'upu leaga iā te A'u. Auā fo'i o lē lē 'au 'ese iā te i latou, e 'au fa'atasi lea ma i tatou" (F. 39, 40).

E fa'apea fo'i ina ua tu'uina atu Iakopo ma Ioane i se olega a lo la'ua tinā, na talosagaina ai ina ia mafai ona fa'atagaina mo i la'ua tulaga e aupito maua'uga ma fa'aaloalogia i le malō o Keriso. Na tali atu le Fa'aola, "Lua te lē iloa le mea lua te ōle mai ai na" Mareko 10:38). E to'aitiiti i tatou e malamalama i le tāua moni o a tatou tatalo! Na silafia e Iesu le tulaga e lē mafai ona fa'atusatusa i ai le mamalu e ao ina fa'atauina mai ai, "O Lē na onosa'i i le satauro, na fa'atauva'a iā te Ia le mā, ona o le 'oli'oli sa tu'u i Ōna luma" (Eperu 12:2). O le 'oli'oli lenā na lagona ina ua va'aia agaga sa fa'asaoia i Lona fa'amaulaloina, Lona puapuagā, ma le fa'amaligiina o Lona toto.

O le mamalu lenā sa tataua ona maua e Keriso, ma o lea na talosagaina e nei so'o e to'alua, atonu o le a mafai ona fa'atagaina i la'ua e tofusia i ai. Na fesili Iesu iā i la'ua, "E mafai ea e oulua ona inu i le ipu 'Ou te inu ai; ma ia papatisoina i le papatisoga e papatisoina ai A'u? Ona la fai mai lea iā te Ia, Ma te mafaia" (Mareko 10:38, 39).

Na itiiti lava so la'ua malamalama i le uiga moni o le papatisoga! "Ona fetalai atu lea o Iesu iā te i la'ua, Lua te inu lava i le ipu 'Ou te inu ai; atoa ma le papatisoga e papatisoina ai A'u, e papatisoina ai oulua; a o le nofo i Lo'u itū taumatau ma Lo'u itū tauāgavale, e lē o iā te A'u lea ona avatu, a e tau lava o ē ua saunia mo i latou lea mea" (F. 39, 40).

E Faitioina le Mitamitavale ma le Fiavi'ia

Na silafia e Iesu mafuaaga na faia ai lea talosaga, ma sa a'oa'ia le mitamitavale ma le fiasili o ia so'o e to'alua: "Ua outou iloa o ali'i o nu'u 'ese ua ali'itai i latou; o ē ua sili fo'i o i latou, ua pule ia te i latou. E lē fa'apea outou; a o sē fia sili iā te outou, ia fai o ia ma a outou 'au'auna; o sē fia muamua fo'i iā te outou, ia fai o ia ma tautua a outou uma. Auā fo'i o le Atali'i o le tagata na lē sau o Ia ina ia 'au'auna tagata iā te Ia, a e peita'i ia 'au'auna o Ia, ma foa'iina atu Lona ola o le togiola e sui a'i tagata e to'atele" (Mareko 10:42-45).

I se tasi o taimi na auina atu ai e Keriso o ;avefe'au e muamua atu iā te Ia i le tasi 'a'ai o Samaria, ma talosagaina tagata mo se tausiga fa'aletino mo Ia ma Ōna so'o. Peita'i ina ua tau lata atu le Fa'aola i le 'a'ai, a e ua foliga mai o lo'o malaga sa'o loa aga'i i Ierusalem. O lenei mea ua fa'aoso a'e ai le to'atama'i o Samaria, ma sa latou lē auina atu 'avefe'au e vala'aulia mo se malōlōga ma i latou. Sa lē fa'aalia le fa'aaloaloga e masani ona

latou avatu i tagata faimalaga o aso faiso'o. E lē 'u'una'i fa'amalosi e Iesu Lona fa'atasi ai i so'o se tasi, ma na lē maua e Samaria le fa'amanuiāga se manū latou te maua pe ana vala'aulia o Ia e fai ma a latou malō.

Atonu tatou te ofo i lenei faiga lē fa'aaloalo i le Tupu o le lagi, peita'i mata e fa'afia iā i tatou o ē fa'apea o tatou e mulimuli iā Keriso ona tatou nofo sala fo'i i le fa'atamala fo'i fa'apea? Tatou te fa'atauānau ea Iesu ia fai o tatou loto ma nofoāga e afio ai fa'apea fo'i i o tatou aiga? E tumu Ia i le alofa, le alofa tunoa, o fa'amanuiāga, ma o lo'o Ia saunia e foa'i mai nei meaalofa iā i tatou; peita'i e pei o tagata Samaria, tatou te ola fiafia pea a e leai ia mea.

O le 'au so'o na latou iloa le finagalo o Keriso ia fa'amanuia tagata Samaria i Lona fa'atasi ai; ma ina ua latou va'aia le lē fiafia, le matau'a, ma le lē āva ua fa'aalia i lo latou Ali'i, na fa'atumulia ai i latou i le ofo ma le ita tele. O Iakopo ma Ioane sa osofia i le matuā lē fiafia lava. O Ia lea o Lē e aupito maualuga ona latou fa'aaloalo i ai a e ua faia fa'apea, ua foliga iā i latou o se agasala e natuā maoa'e e lē mafai ona fa'ate'a lemū a e aunoa ma se fa'asalaga i lea lava taimi. Ona o lo latou ma'elegā, ua latou fa'apea atu, "Le Ali'i e, pe e te finagalo, ma te fai atu ia alu ifo le afi mai le lagi, ia fano ai i latou, pei ona faia e Elia?" (Luka 9:54), e fa'atatau lea i le fa'aumatiāga o ta'ita'i 'au Suria ma a latou 'au ina ua auina atu e pu'e le perofeta o Elia.

A e na a'oa'i atu Iesu i Ōna so'o ma fetalai atu, "E lē iloa e oulua le uiga o oulua loto; auā e le'i sau le Atali'i o le tagata e fa'aumatia le ola o tagata, a ia fa'aolaina" (F. 55, 56). O Ioane ma ōna uso 'au so'o e i le a'oga e a'oa'o ai Keriso. O i latou ua sauni e iloa o latou lava sesē, ma ua naunau ia fa'aleleia a latou amio ma sa tele le avanoa. Sa fa'atāua e Ioane a'oa'oga uma ma na sa'ili'ili i taimi uma ia aumaia lona olaga ia ō gatasi ma le Fa'aa'oa'o Sili. O a'oa'oga a Iesu sa tu'uina mai ai le agamalū, loto maulalo, ma le alofa, o uiga ia e mana'omia i le tuputupu a'e i le alofa tunoa, ma fetai fo'i i lana galuega, o mea ia na aupito tāua iā Ioane. O nei a'oa'oga na tu'uina mai fo'i mo i tatou ta'ito'atasi ma o na o tatou o uso i le ekalesia, a e fa'apea fo'i mo ulua'i so'o o Keriso.

O Ioane ma Iuta

O se a'oa'oga e fa'amalamalamaina o le a mafai ona maua mai i le 'ese'esega mamao lava i le amio a Ioane ma le amio a Iuta. O Ioane o se fa'ata'ita'iga ola o le fa'apa'iaina. I le isi itū, o Iuta sa iā te ia le uiga e foliga mai e fa'afiaamioatua, a e matele i le amio fa'asatani. Sa ia fa'apea o ia o se tasi o le 'au so'o o Keriso, a e o ana 'upu ma ana galuega sa ia fa'afitia o Ia.

Na maua lelei e Iuta avanoa tāua e pei ona maua e Ioane e a'oa'o ai ma fa'ata'ita'i i le Fa'aa'oa'o Sili. Na ia fa'alologologo i a'oa'oga a Keriso, ma o lana amio atonu sa mafai ona suia e ala i le alofa tunoa o le Atua. Peita'i a o tauivi ma le naunautai Ioane e fa'asagatau i ona lava vaivaiga ma sa'ili ia 'avea e pei o Keriso, o Iuta na ia solia lona lava loto fuatiaifo, gaua'i i fa'aosoosoga, ma fa'amautū iā te ia masaniga o le lē fa'amaoni lea na i'u ina liua ai o ia i le fa'atusa o Satani.

O nei so'o e to'alua e fai ma sui o le lalolagi Kerisiano. O tagata uma e ta'utino o latou e mulimuli iā Keriso, peita'i a o savavali le tasi vaega i le loto maulalo ma le agamalū, ma a'oa'oina iā Iesu, o le isi vaega o lo'o fa'aailoa o i latou e lē 'ana'ana i le 'upu a e na o le fa'alologologo. O le tasi e fa'apa'iaina e ala i le 'upu moni; a o le tasi e lē iloa le mana o le alofa tunoa e fa'apa'iaina ai. O le isi vaega e oti iā te ia lava i aso faiso'o, ma manumalō ai i le agasala. A o le tasi vaega e fa'amalieina pea o latou lava tu'inanau, ma avea ai o 'au'auna a Satani.

O le Soifuāga ma le Galuega a Ioane

Matā'upu 8

O le aposetolo o Ioane na fa'aalu tausaga muamua o lona olaga i le vaega o tagata e le'i i ai se a'oa'oga fa'apitoa a e faifaiva o Kalilaia. E le'i fiafia i le a'oa'oina i a'oga; peita'i o lona mafuta fa'atasi ma Keriso, le A'oa'o Sili, na ia maua ai le a'oa'oga e aupito maua e mafai ona maua e tagata ola. Na ia naunau e inu i le vaipuna o le poto, ma ia sa'ili ai e ta'ita'i isi i le "vai'eli o le ola e puna a'e i le ola e fa'avavau" (Ioane 4:14). O le faigofie o ana 'upu, o le malosi o le matagofie ma le maua e mafai ona maua e tagata ola. Na ia naunau e inu i le vaipuna o le poto, ma ia sa'ili ai e ta'ita'i isi i le "vai'eli o le ola e puna a'e i le ola e fa'avavau" (Ioane 4:14). O le faigofie o ana 'upu, o le malosi o le matagofie ma le maua e mafai ona maua e tagata ola. Na ia naunau e inu i le vaipuna o le poto, ma ia sa'ili ai e ta'ita'i isi i le "vai'eli o le ola e puna a'e i le ola e fa'avavau" (Ioane 4:14). O le faigofie o ana 'upu, o le malosi o le matagofie ma le maua e mafai ona maua e tagata ola. Na ia naunau e inu i le vaipuna o le poto, ma ia sa'ili ai e ta'ita'i isi i le "vai'eli o le ola e puna a'e i le ola e fa'avavau" (Ioane 4:14).

Ina ua mavae le afio a'e o Keriso, na tula'i mai Ioane o se tagata fa'atuatua, o se tagata faigaluega malosi mo le Matai. Sa fa'atasi ai ma isi ma na 'oli'oli i le liligiina mai o le Agaga Pa'ia i le Aso Penetekoso, ma e fa'atasi ai ma le ma'elegā fou ma le mana, ma ia fa'aauau le tautala atu i tagata o 'upu o le ola. Na fa'amata'uina i le tu'uina i le falepuipui ma le oti fo'i, a e le'i fefe ai o ia.

E to'atele le motu o tagata mai vaega 'ese'ese na o mai e fa'alologologo i lauga a le 'au aposetolo, ma sa fa'amalōlōina mai o latou ma'i e ala i le suafa o Iesu, o le suafa lea na matuā itagia e Iutaia. O faitaulaga ma ta'ita'i sa matuā fa'aosofia le ita i lo latou tete'e atu a o latou va'aia ē mama'i ua fa'amalōlōina ma fa'aeaina ai Iesu, o Ia le Ali'i o le Ola. Na fefefe i latou ona ua tai lata i le taimi e talitonu ai le lalolagi atoa iā te Ia, ona molia lea o i latou i le fasiotia o Lē Fa'amalōlō Sili. Peita'i o le tele o a latou taumafaiga e taofi lenei fa'agae'etia o tagata, o le tele fo'i lea o ē ua talitonu iā te Ia ma liliu 'ese mai a'oa'oga a tusi'upu ma Faresaio. Sa fa'atumuina i latou i le ita, ma ina ua latou tagolima iā Peteru ma Ioane, sa latou lafo i la'ua i le falepuipui. A e o le agelu a le Ali'i, i le pō, na tatalaina faitoto'a o le falepuipui ma aumai i la'ua i fafo, ma fa'apea atu lea, "Inā o ia outou, inā tutū i le malumalu ma tautala atu i le nu'u i 'upu uma lava o lenei olataga" (Galuega 5:20).

I lona fa'amaoni ma le naunauta'i na tau'ave pea e Ioane le molimau mo lona Ali'i i taimi uma e talafeagai ai. Na ia va'aia o lenei taimi ua fa'atumuina i fa'afitauli mo le ekalesia. O Satani ma ana tau'avesesē ua i so'o se mea. O mafaufau o tagata ua fesese'a'i i auala lē sa'osa'o o le masalosalo ma matā'upu tau'avesesē. O nisi sa fa'afoliga mai e fa'amaoni i le galuega a le Atua a e o latou o ē tau'avesesē. Ua latou fa'afitia Keriso ma Lana tala lelei, ma latou aumai talitonuga e tau'avesesēina ma ola ai i le soliga o le tulafono pa'ia.

O le Matā'upu e Sili le Pele iā Ioane

O le matā'upu autū fa'apitoa a Ioane o le alofa e leai se mea e gata ai o Keriso. Na talitonu ia i le Atua e pei ona talitonu le tamaitiiti i se tamā e fa'apalepale ma agalelei iā te ia. Na ia malamalama i le uiga ma le galuega a Iesu; ma ina ua ia va'ai i ōna uso Iutaia o lo'o o tautagotago i o latou lava ala e aunoa ma se 'ave mai le Lā o le Amiotonu e fa'amalamalamaina ai lo latou ala, na ia naunauta'i e tu'uina atu iā ta i latou Keriso, le Malamalama o le lalolagi.

O lenei aposetolo fa'amaoni na va'ai atu i lo latou tauaso, lo latou mitamitavale, talitonuga i 'uputu'u, o le fefe ona e leai se fa'amoemoe, ma le lē iloa o le Afioga a le Atua ua fa'amaui ai o latou agaga i filifili e lē mafai ona motusia. O le fa'ailoga tagata ma le ino'ino tele iā Keriso ua latou taofimau i ai ma le fiafia, ua aumaia le fa'atafunaga i luga o lo latou malō ma fa'aumatia ai o latou fa'amoemoe mo le ola e fa'avavau. Peita'i na fa'aauau pea e Ioane ona fa'ailoa atu Keriso iā i latou, ona pau lea o le ala i le fa'aolataga. Na matuā manino

lelei le fa'amaoniga o Iesu le Nasareta, o Ia le Mesia, lea na fa'a'iloa atu e Ioane e leai se tagata e mana'omia ia savali i le pouliuli o mea sesē a o lo'o i ai le malamalama ua uma ona ōfoina mai iā te ia.

Fa'afa'anoanoaina e Mea Sesē 'O'ona

A o ola Ioane na ia va'aia le laugaina o le tala lelei i nu'u lata mai ma nu'u e mamao, ma e afe ma afe i latou ua talia ma le fiafia ana a'oa'oga. A e peita'i sa fa'atumulia pea o ia i le fa'anoanoa a o ia matauina le sosolo mai o a'oa'oga sesē i totonu o le ekalesia. O nisi na talia Keriso ua latou ta'utino o Lona alofa ua tu'usa'oloto ai latou mai le usiusita'i i poloa'iga a le Atua. A e o le isi itū, e to'atele ua a'oa'o e tatau ona tausī mata'itusi o le tulafono, fa'apea fo'i ma sauniga ma aganu'u fa'a-lutaia uma, ma ua lava ia mea mo le fa'aolataga, e aunoa ma le toto o Keriso. Ua latou taofi o Keriso lava ia o se tagata lelei, e pei o le 'au aposetolo, a e latou te fa'afitia Lona itū Atua. Na va'aia e Ioane le mata'utia o le a aliali ma va'ai i ai le ekalesia, pe afai e latou te talia ia manatu, ma sa ia fa'afeiloa'i nei manatu ma filifiliga i lea lava taimi. Na ia tusi loa i se fesoasoani fa'amaoni o le tala lelei, se tama'ta'i e lauiloa ma lelei lona tulaga, e fa'apea:

"E to'atele o ē fa'asesē ua ō atu i le lalolagi, o ē lē ta'utino ua maliliu mai Iesu Keriso i le tino; o le fa'asesē lava lea ma le anetikeriso. Ia outou iā te outou, ne'i maumau a matou galuega na matou faia, a ia maua le tau'i atoa. O i latou uma lava o ē tu'umavaega, a e lē tumau i le mata'upu iā Keriso, e lē o iā te i latou le Atua; o lē tumau i le mata'upu iā Keriso, e iā te ia lava le Tamā atoa ma le Ālo. Pe a alu atu iā te outou se tasi a e lē molia lenei lava mata'upu, 'aia tou te talia o ia i o outou fale, 'aia fo'i tou te ofo alofa iā te ia; auā o sē ofo alofa atu iā te ia, e fa'atasi ai o ia ma ana galuega leaga" (II Ioane 1:7-11).

E le'i fa'apea na fa'ataunu'uina lana galuega e aunoa ma ni mea e fa'alavelave mai. O Satani e lē o se paiē. Sa ia fa'aoso tagata amioleaga ina ia fa'apu'upu'uina le ola aogā o lenei tagata o le Atua, a o agelu pa'ia na puipui iā te ia mai a latou osofa'iga. E tatau ona tula'i pea Ioane, o se molimau fa'amaoni mo Keriso. O le ekalesia i ona taimi faigatā na mana'omia ai lana molimau.

E ala i le taufa'asesē ma le fai mea e lē tonu, ua sa'ili sui o Satani e fa'atupu le itū e tete'e iā Ioane ma tete'e ai le talitonuga iā Keriso. O le i'uga na lamatia loa le ekalesia i fe'ese'esea'iga ma talitonuga 'ese ua o'o mai. Na fa'afeiloa'i e Ioane nei mea sesē e aunoa ma le fefe; na ia fa'afesaga'i ma fili o le 'upu moni. Na ia tusi ma fautua, ia lē tatau ona maua se fa'amalosia'aga mo i latou o lo'o ta'ita'i e taufa'asesē. O i ai i ōna pō nei le ti'apolo e pei o i latou ia na taufa'aleaga le manuia o le ulua'i ekalesia, ma o a'oa'oga a le aposetolo e fa'atatau fo'i lava i mata'upu ia e ao ona fa'autagia ma le fa'aeteete. "E ao ona iā te outou le alofa," o le alaga lea e tatau ona lagona i so'o se mea, a e maise mai iā i latou o ē ta'u mai ua fa'apa'iaina. Peita'i e mamā tele le alofa e lē mafai ona ufiufi ai se agasala e lē fa'aalia. O a'oa'oga a Ioane e matuā tāua mo i latou o lo'o ola i totonugalemū o faigatā o aso o le i'uga. O ia na mafuta vāvālalata ma Keriso, na ia fa'alologologo i Āna a'oa'oga ma sa molimauina Āna vavega ofoofogia e tele. Na ia tau'ave le molimau e talitonuina, lea na fa'alēaogāina ai mea sesē na taumafai e Ōna fili.

'Aua Ne'i Fetu'utu'una'i ma le Agasala

Na oli'oli Ioane i le fa'amanuiāga o le fa'apa'iaina moni. Peita'i e lē o fa'apea mai le aposetolo o ia e leai sana agasala; na ia sa'ilia pea le ato'atoa i le savali i le malamalama o le fa'atasi ai o le Atua. E molimau ia o le tagata e fa'apea mai e iloa le Atua a e soli Lana tulafono pa'ia, ua ia pepelo i le mea na ta'utino ai. "O sē fa'apea, Ua 'ou iloa o Ia, a e lē tausī e ia i Āna poloa'iga, o le pepelo lava lea, e lē o i totonu iā te ia le upu moni" (I Ioane 2:4). Peita'i ua a'oa'o e le aposetolo a o tatau ona tatou fa'aalia le āva fa'a-Kerisiano, e iā i tatou le aiā e ta'u ai le agasala ma tagata agasala i o latou igoa sa'o - e ō gatasi lea ma le alofa moni. E moni e ao ina tatou alofa i agaga na maliliu ai Keriso, ma galulue mo lo latou fa'aolataga, a e lē tatau ona tatou faia se fetu'utu'una'iga ma le agasala. E lē tatau ona tatou 'au'aumea fa'atasi ma ē fouvale, ma ta'u lea mea o le alofa. E mana'omia e le Atua Ōna tagata i lenei augātupulaga o le lalolagi ia tula'i mai, e pei ona faia e Ioane i lona taimi, na le'i 'alo mai le mea sa'o, i le tete'e atu i mea sesē e fa'aumatia ai le agaga.

E lē Fa'apa'iaina Pe a lē Usiusita'i

E to'atele isi na matou feiloa'i ua ta'u mai o latou e ola e aunoa ma le agasala. Peita'i ina ua tofotofo e fa'atautau i le Afioga a le Atua, o nei tagata o lo'o solia fa'aaliali Āna tulafono pa'ia. O le molimau e aupito manino o le tumau ma le malosī o le fusi o le tulafono e fā, e lē fafagu ai le loto fuatiaifo. E latou te lē mafai ona fa'afitia le finagalo o le Atua, peita'i e taumafai e fai se 'alofaga mo le lē tausia o le Sapati. Ua ta'u mai o latou ua fa'apa'iaina, ma o lo'o latou 'au'auna i le Atua i aso uma o le vaiaso. E latou te fai mai, e to'atele tagata lelei e le'i tausī Sapati. Pe afai o tagata ua fa'apa'iaina, o le a leai se fa'asalaga i o latou luga, ona o le Atua e tele Lona alofa tunoa o le a lē fa'asalaina ai i latou ona ua lē fa'amamaluina ma tausia le aso fitu. E faitauina lava latou e na o le to'atasi i le fa'apotopotoga pe afai e tausī le Sapati, ma o le a leai se 'afiāga i le lalolagi. Ma e tataua ona i ai i lalo ifo o le puleaga o lo'o i ai.

Na fa'avi'ivi'i e Eva ia lava ina ua fa'apea o le Atua e sili le agalelei o le a Ia lē fa'asalaina ai o ia i lona lē usiusita'i i Āna fa'atonuga sa tu'uina mai. O le manatu lava lea e tasi o lo'o 'u'una'ia e le afe ma afe o tagata e fai ma 'alofaga o lo latou lē usiusita'i i le poloa'iga e fā. O i latou e i ai le agaga o Keriso o le a latou tausī i tulafono uma a le Atua, e tusa pe o le ā le i'uga e o'o i ai. Ua fetalai mai le Tupu o le lagi, "Ua 'Ou tausia poloa'iga a Lo'u Tamā" (Ioane 15:10).

Na tofotofo Atamu ma Eva e soli fa'atonuga a le Ali'i, ma e mata'utia le i'uga o la la'ua agasala e ao ina fai ma lapata'iga iā i tatou ia 'aia tatou te mulimuli i ai i lea fa'ata'ita'iga o le lē usiusita'i. Na tatalo Keriso mo Ōna so'o i nei 'upu, "Ia e fa'apa'iaina i latou i Lau 'upu moni; o Lau afioga o le 'upu moni lea" (Ioane 17:17). E leai se fa'apa'iaina moni se'i vaganā le usiusita'i i le 'upu moni. O i latou e alolofa i le Atua ma o latou loto atoa o le a alofa fo'i i Āna poloa'iga uma lava. O le loto ua fa'apa'iaina e ō gatasi ma fa'atonuga o le tulafono a le Atua; auā e pa'ia, e tonu, ma e lelei.

E Le'i Suia le Uiga o le Atua

E le'i suia lava le uiga o le Atua. O Ia lava lea o le Atua e fuā i le asō e pei lava o le taimi na Ia tu'u mai ai Lana tulafono i luga o Sinai, ma sa tusia ai e Lona lava 'a'ao i luga o le papa ma'a. O i latou e soli le tulafono pa'ia a le Atua atonu o le a fa'apea mai, "O a'u ua fa'apa'iaina;" a e o le fa'apa'iaina moni, ma le ta'u mai ua fa'apa'iaina, e 'ese'ese ia mea e lua.

E le'i suia le tulafono a le Atua i le Feagaiga Fou. O le pa'ia o le Sapati o le poloa'iga e fā o lo'o maualā le fa'avae e pei o le nofoāli'i o le Atua. Ua tusi Ioane, "O i latou uma lava o ē fai le agasala, ua latou soli fo'i i tulafono; o le agasala o le solitulafono lava lea. Ua outou iloa fo'i na fa'aalia o Ia ina ia 'ave'eseina e Ia a tatou agasala; e lē o iā te Ia fo'i se agasala. E lē agasala se tasi o ē tumau iā te Ia; o sē agasala ua lē va'ai o ia iā te Ia, ua lē iloa fo'i o ia e Ia" (I Ioane 3:4-6). Ua mafai ona fa'aaofia i tatou i le tulaga e tasi na tu'u i ai e le so'o pele i latou o ē fa'apea ua mafuta iā Keriso, ia fa'apa'iaina, a e o lo'o ola pea i le soliga o le tulafono a le Atua. Na fetau i ia ma le vaega o tagata fa'apenā e pei fo'i o ē o le a tatou feiloa'i. Ua fa'apea mai ia, "Le fanau e, 'aia ne'i fa'asesē se tasi iā te outou; o lē fai le amiotonu, o le amiotonu lea, fa'apei ona amiotonu o Ia. O lē fai le agasala, mai le ti'apolo lava ia; auā ua agasala le ti'apolo talu le amataga" (F. 7, 8). O iinei o lo'o tautala ai le aposetolo i 'upu e malamalama gofie, e pei ona ia manatu o le matā'upu e mana'omia ona tautalagia.

O le agaga o le alofa e mānavaina mai e tusi a Ioane. Peita'i a ia feso'ota'i ma le vaega o ē soli le tulafono a le Atua a e fa'apea mai o lo'o latou ola e aunoa ma le agasala, e lē fa'atuai lava ia e lapata'i i latou i lo latou tulaga ua mata'utia le fa'asesēina. "Afai tatou te fai atu, ua tatou mafuta fa'atasi ma Ia, a e savavali i tatou i le pouliuli, ua tatou pepelo ai, ua tatou lē faia fo'i le 'upu moni. A e afai tatou te savavali i le malamalama, fa'apei ona i ai o Ia i le malamalama, ona tatou mafuta fa'atasi ai lea o le tasi ma le tasi, o le toto fo'i o Iesu Keriso Lona Alo e fa'amamāina ai i tatou i agasala uma lava. Afai tatou te fa'apea, E leai sa tatou agasala, ua sesē ai i tatou iā i tatou, e lē o i totonu iā te i tatou le 'upu moni; a e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. Pe afai tatou te fa'apea, Tatou te le'i agasala, ua tatou fai ai o Ia ma pepelo, e lē o i totonu iā te i tatou Lana afioga" (I Ioane 1:6-10).

O Ioane ua Fa'a'aunu'ua

Matā'upu 9

O le manuia ofoofogia na aofia i le laugaina o le tala lelei e le 'au aposetolo ma ē na latou galulue fa'atasi sa fa'atuputeleina ai le ita o fili o Keriso. Na latou faia taumafaiga uma e fa'alavelave ai le aga'i i luma, ma i'u ai ina latou maua le lagolago malosi a le ta'ita'i o le malō o Roma e tete'e ai i Kerisiano. O se sauāga mata'utia na mulimuli ai ma na fasiotia ai le to'atele o ē na mulimuli iā Keriso. O le taimi lea ua matua lava le aposetolo o Ioane, peita'i o lona naunauta'i tele ma le manuia na maua, na ia fa'aauau pea le laugaina o le matā'upu a Keriso. Na iā te ia le molimau e malosi, sa lē mafai e i latou e tete'e mai ona fa'afinauina, ma fa'apea ona atili fa'amalosia ai ōna uso.

Pe afai ua tau maluelue le fa'atuatua o le 'au Kerisiano i lalo o le malosi o le tete'e mai ma sa fa'amalosia e latou te fesaga'i, na toe ta'u atu iā i latou e le aposetolo, ma le fa'aaloalo, malosi, ma le manino, "O le mea sa i ai talu le amataga, na matou fa'alologologo i ai, na matou va'ava'ai atu i ai o matou mata, na matou matamata ai, na tagotago fo'i o matou lima i a le Lokou o le ola;...ma ua matou ta'u atu ia te outou le ola e fa'avavau, o lenā sa i le Tamā, a ua fa'aalia mai iā te i matou; o le mea na matou va'ava'ai i ai ma fa'alologologo i ai, matou te ta'u atu ai iā te outou, ina ia outou mafuta fa'atasi ma i matou; o lo'o matou mafuta fa'atasi foi' i le Tamā lea atoa ma Lona Alo o Iesu Keriso." (I Ioane 1:1-3).

O le ita e matuā tele lava ua tutu e fa'asaga iā Ioane ona o lona fa'amaoni e mautū i le matā'upu iā Keriso. O ia o le so'o mulimuli lea na totoe o le 'au so'o o ē na feso'ota'i vāvālalata tele ma Iesu, ma ua filifili ōna fili ia fa'amutaina lana molimau. Pe a mafai ona fa'ataunu'uina o lea mea, ua latou manatu o le a lē toe fa'asalalauina ai le talitonuga iā Keriso; ma afai e matuā fa'atigāina le faiga, atonu o le a mafai ona vave ona fa'aumatia mai le lalolagi. Na fa'apea loa ona fa'atonuina Ioane ia alu atu i Roma e su'esu'eina ai mo lona fa'atuatuāga. Sa fa'auigasesē lona talitonuga. Na molia e molimau pepelo ia o se tagata fouvale ma fa'atu'i'ese, e a'oa'o i nofoāga faitele matā'upu ina ia fa'ato'ilaloina ai le malō.

Na ta'u atu e le aposetolo lona fa'atuatuāga i se auala manino ia talitonu ai tagata, o le faigofie ma le fa'amaoni o āna 'upu na 'i ai se 'a'afiāga malosi. O ē na fa'alologologo iā te ia ua maofa i lona poto ma ana 'upu onomea. Peita'i o le tele o le fa'atalitonuina i lana molimau, o le loloto fo'i lea o le ita o ē tete'e i le 'upu moni. Sa fa'atumuina le ta'ita'i o le malō Roma i le ita tele, ma ua faifai i le suafo o le Atua ma Keriso. Sa lē mafai e ia ona finau mafauauga a le aposetolo pe fa'afetaui le malosi o lo'o avatu ma fa'amatala ai le 'upu moni. Sa ia manatu loa ma faia lana fa'ai'uga i se faiga ina ia 'aia ai ona toe lagona le leo o le fautua fa'amaoni.

E Le'i Fa'afilemūina le Molimau a le Atua

O i nei tatou te va'ai ai i le ma'a'a e o'o i ai le loto o le tagata pe a ia manatu e tete'e i le finagalo o le Atua. O fili o le ekalesia ua mautū o latou manatu ia fa'aauau pea lo latou tulaga e mitamitavale ai ma le pule i luma o tagata. E ala i le poloa'iga a le ta'ita'i o le malō, na fa'aaunu'ua ai loa Ioane i le motu o Patamo, ua ta'usalaina, fa'apei ona ia ta'u mai, "ona o le afioga a le Atua ma le mau iā Iesu Keriso" (Fa'aaliga 1:9). Peita'i o fili o Keriso sa matuā lē manumalō i la latou fuafuāga ia lē toe lagona le leo o Lana molimau fa'amaoni. Mai lona nofoāga na fa'aaunu'ua ai, ua sau ai le leo o le aposetolo, e o'o mai lava i le taimi o le i'uga o lo'o alagaina ai pea 'upu moni e aupito sili ona matagofie ua fa'alogo i ai tagata ola.

O Patamo o se motu gaoā ma lafulafuā i le Sami o Aegean, lea sa filifilia e le malō Roma e fai ma nofoāga e 'ave fa'aaunu'ua ai tagata solitulafono. A e mo le 'au'auna a le Atua o lenei nofoāga faigatā na pei o le faitoto'a o le lagi. Na 'ave'esea o ia mai va'aiga vevesi o le olaga ma gaoioiga o le galuega a le tagata tala'i, peita'i e le'i punitia ai o ia mai le silafaga a le Atua.

I lona aiga tu'ufua na ia mafai ona feso'ota'i ai ma le Tupu o tupu, ma su'esu'e vāvālalata ai le fa'aalitinoina o le malosi fa'alelagi i le tusi o uiga o mea na faia. Na fiafia o ia e mafaufau loloto i le galuega tele o le foafoāga ma ia vi'ia ai le mana o le Matai foafoa Pa'ia. I tausaga ua mavae na fa'afeiloa'i ōna mata i le va'aiga o atu mauga e ufitia i la'au, o vanu lanu lau'ava, ma fuala'au aina i luga o fanua laugatasi; ma o nei mea uma na fiafia ai o ia i le matagofie o mea e feso'ota'i ma le poto ma le silisili'ese o Lē na foafoaina. A o lea ua si'omia nei ia i le va'aiga e foliga i le tele o tagata e pogisā ma e leai se isi e fiafia i ai. Peita'i e le'i fa'apenā le va'aiga a Ioane. Na mafai e ia ona faitauina lesone aogā ma le tāua o le mea tu'ufua, o papa alā, o mea lilo o i le sami loloto, ma le mamalu o le vānimonimo. I a Ioane, o nei mea uma ua fa'aalia ai le mana o le Atua ma Lona mamalu.

O le Leo o Mea o le Foafoāga

Na va'aia e le aposetolo i lona si'osi'omaga le molimau o le Lolo, lea sa ufitia ai le lalolagi atoa ona o ē na ainā le lalolagi, ina ua latou tofotofo e soli le tulafono a le Atua. O papa na ō a'e mai le loloto o le lalolagi ina ua tatala mai punāvai, na tu'u manino i lona mafaufau le mata'utia o le liligiina mai o le to'asā o le Atua.

Peita'i a o si'osi'omia ia i lalo nei i se tulaga e foliga mai e gaogao ma tu'ufua, o le lagi lanumoana i luga o le aposetolo i le motu tu'ufua o Patamo ua susula malamalama ma matagofie e pei o le vāteatea i luga o lona nu'u pele o Ierusalem. Ia fa'aavanoa e le tagata se taimi e tepa tasi a'e ai i le mamalu o le lagi i le pō ma mātau galuega na faia i le mana o le Atua, ma o le a a'oa'oina ai se lesone i le silisili'ese o Lē na faia mea uma pe afai e fa'atusatusa ma lona ia lava fa'atauva'a. Pe afai ua ia fa'apelepele le mitamitavale ma manatu e tāua ia lava ona o le tamā'o'aiga, taleni, po o lona ia lava uiga tosina, se'i alu ia i fafo i se pō manino ma va'ai a'e i le matagofie o fetū o le lagi, ma a'oa'oina ai ia fa'amaulalo lona loto mai le silafaga a Lē Silisili 'Ese.

Mai le leo o vai e tele - vai loloto e pei o fetalai'i - na fa'alogoina ai e le perofeta le si'ufofoga o Lē na foafoa mea uma. O le sami, ua lafoia ona o le malosi o le matagi, ua fa'ailoa mai iā te ia le to'asā o le Atua ua fa'atigā e le tagata. O galu mauaululuga ma le mata'utia, ua pei o lo'o taofia ia 'aua ne'i sili a'e i le tuā'oi e se lima e lē mava'aia, ua ta'uina iā Ioane le mana e pulea mea loloto. Ina ua fa'atusatusa, na ia va'ai ma lagona ai le valea ma le vaivai o le tagata, e na o ilo o le 'ele'ele, o ē mitamitavale i lo latou poto ma le malosi, ma manatu i o latou loto e tete'e i le Pule o le atulaulau, e peiseā'i o le Atua e tutusa ma i latou. E matuā tauaso ma lē aogā le mitamitavale fa'aletagata! O le itulā e tasi o le fa'amanuiāga i le susulu o le lā ma le timu i luga o le 'ele'ele o le a faia mea e sili atu le tele mo le suiga o foliga o le natura i lo mea uma e faia e le tagata i lona poto mitamitavale ma taumafaiga uma e mafai ona 'ausia i lona olaga atoa.

I le si'osi'omaga i lona nofoāga i le motu, na faitauina e le perofeta fa'amaoniga o le mana o le Atua, ma o galuega uma o mea na faia, na feso'ota'i ai ma lona Atua. O le lagona e aupito naunau i ai le agaga e sa'ili i le Atua, o tatalo fa'atauānau, na alu a'e i le lagi mai le motu gaoā o Patamo. A o va'ai atu Ioane i papa, na fa'amanatu ai iā te ia o Keriso, o le papa o lona malosi, o lona lafitaga e mafai ona ia malu ai e aunoa ma le fefe.

O Lē Tausi Sapati

O le aso o le Ali'i ua ta'ua e Ioane o le Sapati, o le aso na malōlō ai Ieova ina ua mae'a Lana galuega tele o le foafoāga, ma sa ia fa'amanuia ma fa'apa'ia auā na ia malōlō ai. O le Sapati na tausia ma fa'apa'ia e Ioane i le motu o Patamo, e pei o aso na ia fa'atasi ai ma tagata na lauga ai i lea aso. I autafa o papa sa si'omia ai o ia, sa fa'amanatu ai iā Ioane le mauga gaoā o Horepa, ma na fa'apea ona fetalai mai ai e le Atua Lana tulafono i tagata, "Ia e manatua le aso Sapati e te fa'apa'iaina" (Esoto 20:8).

O le Ālo o le Atua na fetalai iā Mose mai le tumutumu o le mauga. Na faia e le Atua papa ma Ōna malumalu, ma o atumauga o Lona malumalu lea e fa'avavau. Na afio ifo le Faitulafono Pa'ia i le mauga gaoā e fetalai mai ai Lana tulafono ina ia lagona e tagata uma, ina ia latou iloa le tāua o le maoa'e ma le mata'utia o le fa'aalia o le malosi ma le mamalu, ma ia matata'u e soli Āna poloa'iga. Na fetalai mai le Atua i totonu o faititili ma le emo o le uila, fa'apea ao mafiafia i luga o le mauga, ma o Lona si'ufofoga ua pei o le leo o le pūe matuā leo tele. O tulafono a Ieova e lē mafai ona suia, ma o papama'a ua tusia ai o papa moni, e iloa ai e lē masuia Āna

poloa'iga. O le mauga gaoā o Horepa ua 'avea ma nofoāga e pa'ia iā i latou uma o ē alolofa ma āva i le tulafono a le Atua.

Tapunia Fa'atasi ma le Atua

A o mafaufau loloto Ioane i va'aiga o Horepa, na afio ifo i ōna luga le Agaga o le Ali'i na fa'apa'iaina le aso fitu. Sa ia manatunatu i le agasala a Atamu na ia solia ai le tulafono pa'ia. ma le i'uga mata'utia o lenā solitulafono. O le alofa e lē uma o le Atua na aumai ai Lona Ālo ina ia togioa ai le aigā tagata ua lē iloa, o se mea e matuā tele le faigatā i le gagana ona fa'amatala i ni 'upu. A o ia tu'uina atu i lana tusi na ia vala'au i ekalesia ma le lalolagi ina ia va'ai i ai ma malamalama. "Fa'auta i le silisili o le alofa ua foa'iina mai e le Tamā iā te i tatou, ina ua ta'ua i tatou o le fanau a le Atua; o le mea lea e lē iloa ai i tatou e le lalolagi, auā na lē iloa o Ia" (I Ioane 3:1). O se mea lilo iā Ioane le tu'uina mai e le Atua Lona Ālo ina ia maliu mo le tagata fouvale. Na ia lē malamalama a e ua maofa ona o le fuafuāga o le fa'aolataga, ua fuafuaina i se tau e matuā tele mo le lagi, a e lē mafai ona mafa'amatalaina ona ua te'ena e i latou o ē na faia fa'atautau i ai le taulaga.

Na tapunia fa'atasi Ioane ma le Atua. A o a'oa'o atili e ia le uiga o le Atua e ala i galuega o le foafoāga, na fa'atuputeleina ai fo'i lona āva ma le fa'aaloalo i le Atua. Na ia fesili iā te ia lava, Aiseā e lē mafai ai e tagata, o ē na o le Atua e fa'alagolago i ai, ona sa'ili ia maua le filemū iā te Ia pe a latou usiusita'i ma le loto malie? E lē gata Lona poto, ma e leai se tuā'oi o Lona mana. Na te pulea le atulaulau ma o latou lalolagi e lē mafaitaulia. E na te fa'asao ia ō gatasi le ofoofogia maoa'e ma le matagofie o mea na Ia foafoaina. O le agasala o le solia lea o le tulafono a le Atua, ma o le totogi o le agasala o le oti lea. Se manū e leai se fevaevae'iga i le lagi po o le lalolagi pe ana lē ulufale mai le agasala. O le lē usiusita'i i le tulafono a le Atua na aumaia le malaia ua aofia ai mea ola uma na Ia faia. Ai seā ua lē faia ai e tagata se leleiga i le Atua?

E lē o se mea māmā le agasala e aga'i i le Atua, i le tu'u atu o le loto finauvale o le tagata e fa'asagatau i le finagalo o Lē na faia o ia. E mo le lelei o le tagata, e fa'apea ma lenei lalolagi, ina ia usiusita'i i le tulafono a le Atua. Ma o le mea mautinoa mo lo latou lelei e fa'avavau o le gaua'i i le Atua, ma ia lelei ma Ia. O manu o le vao e latou te usiusita'i i tulafono a le Atua ia ua tu'uina iā i latou e pulea ai i latou. Ua fetalai o Ia i le vasa lautele, "E te o'o mai i'inei, a e e te lē sopo'ia" (Iopu 38:11); ma e usiusita'i le suāsami i Lana afioga. O paneta e ta'amilo i fa'asologa e ato'atoa ona usiusita'i i tulafono ua fa'atūina e le Atua. I mea uma na faia e le Atua i luga o le fogā'ele'ele, e na o le tagata lava e fouvale. A e e iā te ia le pule e mafaufau e fetu'una'i ma malamalama ai i mea e ao ona fai e tusa ma le tulafono pa'ia ma le loto fuatiaifo e lagona ai le ta'usalaina o le solitulafono, ma le filemū ma le oli'oli mai le usiusita'i. Na faia e le Atua le tagata ia i ai le pule sa'oloto, pe usiusita'i pe lē usiusita'i. O le tau i le ola e fa'avavau - o le mamalu lea e fa'avavau - ua folafolaina iā i latou o ē faia le finagalo o le Atua, a o le lapata'iga mata'utia o Lona to'asā e fa'amālumālu mai lea i luga o i latou uma o ē tete'e Lana tulafono.

O le Mamalu o le Atua

A o mantunatu loloto Ioane i le mamalu o le Atua o lo'o fa'aalia i Āna galuega, na maofa o ia i le matuā ofoofogia ma le maoa'e o le mamalu o Lē na foafoaina mea uma. Pe afai o tagata uma o lo'o ainā lenei lalolagi itiiti e latou te lē o fia usiusita'i i le Atua, o le a lē 'avea lea ma mea o le a leai ai Sona mamalu. E mafai ona Ia 'ave'esea mai le fogā'ele'ele tagata ola uma i se taimi fa'atauva'a pei o le 'emo o le mata, ma Ia toe faia ni tagata fou e fa'aainā le lalolagi ma vi'ia ai Lona suafa. E lē fa'alagolago le Atua i tagata mo vi'iga. E mafai ona Ia fa'atonuina 'au a le lagi, o le miliona o lalolagi i lugā i le vāteatea, ina ia latou pepese se vi'iga o le fa'ane'ene'e ma vi'iga o le mamalu o Lē na foafoaina i latou. "Ieova e, e vivi'i le lagi i Ōu vavega; e vi'ia fo'i Lou fa'amaoni i le fa'apotopotoga o le 'au pa'ia. Auā o ai ea i le lagi e fa'atusaina Ieova? O ai so le fanau a ē malolosi e tusa ma Ieova? O le Atua e tatau ona mata'utia tele i le fa'apotopotoga o le 'au pa'ia; e tatau fo'i ona mata'utia o Ia e i latou uma o ē vagavagai iā te Ia" (Salamo 89:5-7).

Se Va'aiga o Keriso

Na toe fa'amanatuina e Ioane va'aiga matagofie o mea na tutupu sa ia molimauina i le soifuāga o Keriso. I lana va'aiga fa'alemafaufau na ia toe fiafia ai i avanoa tāua na 'avea ai ia o lē na alofaina, ma sa matuā fa'amafanafanaina ai o ia. Na fa'afuase'i ona motusia ona mafauauga, ua vala'auina o ia e se leo e manino lelei. Na ia faliu e va'ai po o fea e sau ai le leo, Oi! ua ia va'aia lona Ali'i, o Lē sa ia alofa i ai, na la masani ona savavali ma talanoa fa'atasi, ma na ia molimauina Ōna pupuagā i luga o le satauro. Peita'i, o se suiga i le va'aiga o le Fa'aola! O Ia ua lē toe pei "o le tagata fa'anoanoa, ua masani fo'i ma le tigā" (Isaia 53:3). E lē o iā te Ia ni fa'aailoga o le fa'amaulaloina. O Ōna fofoga e pei o le mumū o le afi; o Ōna vae e pei o le 'apa pupula, e peiseā'i ua mū i le ogāumu. O Lona si'ufofoga e pei o le ta'alili o vai e tele, ua susulu mai Ōna fofoga pei o le pupula o le lā i lona atoa. Ua i Lona 'a'ao taumatau o fetū e fitu, e fa'asino lea i ta'ita'i o ekalesia. Ua alu atu mai Lona fofoga o le pelu e ma'ama'ai ona itū e lua, o le fa'atusa o le malosī o Lana afioga.

O Ioane, o lē na alofa tele i lona Ali'i, ma na taofi mau pea i le 'upu moni i le fesāga'i ai ma le falepuipui, sasaina, ma fa'amata'u i le oti, a e na ia lē mafai ona lavatia le fa'atasi ai o le mamalu o Keriso, ma ua pa'ū i le 'ele'ele e peiseā'i o se tagata ua oti. Na fa'ae'e e Iesu Lona 'a'ao taumatau i luga o Lana 'au'auna ma fetalai atu, "'Aua e te fefe;...o A'u Lē ola nei lava, sa 'Ou oti, fa'auta fo'i, 'Ou te ola e fa'avavau fa'avavau lava" (Fa'aaliga 1:17, 18). Na fa'amalosia Ioane e ola i le fa'atasi ai o lona Ali'i ua fa'amamaluina, ma na tu'uina atu loa i ōna luma fa'aaliga pa'ia o fuafuāga a le Atua mo augātupulaga o i lumana'i.

Na fa'aailoa iā te ia le va'aiga matagofie o le aiga i le lagi. Na fa'atagaina o ia e va'ai i le nofoāli'i o le Atua ma iloa le motu o tagata e ofu sinasina ua fa'aolaina. Sa ia fa'alogoia pesega a agelu o le lagi, ma vi'iga o le manumalō mai iā i latou o ē na manumalō ona o le toto o le Tama'i Mamoe ma le 'upu o la latou molimau.

O le Loto Maulalo o Ioane

Mo le so'o na alofaina sa tu'uina i ai le avanoa maua luga e lē to'atele ni tagata ola ua latou maua. Peita'i ona o le felata'i o lana amio e pei o Keriso, e le'i i ai se uiga mitamitavale i lona loto. O lona loto maulalo e le'i na o se fa'afoliga; na ufiufi o ia e le alofa tunoa e pei o se ofu. Na ia sa'ilia auala e nātia ai lona ia amiotonu ma 'alo'ese mai gaioiga uma atonu e foliga o le a tosina ai tagata iā te ia. I lana Evagalia, e ta'ua e Ioane le so'o na alofaina, peita'i na fa'alilo le mea moni o ia lava lea ua fa'aaloaloga.

O le amio a Ioane sa aunoa ma le alofa fa'apito. O lona olaga i aso faiso'o na ia a'oa'o ma ola e fa'aalia ai le alofa e matuā ato'atoa. Sa maua luga lona manatu i le itū'aiga alofa e tatau pna i ai i totonu o ;e mafutaga a le 'au uso Kerisiano. Na ia fa'aali ma ūna'i lea alofa o se amio e mana'omia ma e tatau ona i ai i ē mulimuli iā Iesu. Afai e aunoa ma lea, o fa'a'upuga uma e fa'atatau i le Kerisiano o le a leai se aogā.

O Ioane o le a'oa'o o le fa'apa'iaina e fa'atinoina. Na ia ta'u mai tulafono e sa'o mo le amio a le Kerisiano. E ao ina mamā le loto ma ia sa'o le amio. E leai se taimi e tatau ona fa'amalieina ai ia na o 'upu e fai a e lē fa'atinoina. Na ia fa'aailoa manino mai i 'upu tu'u sa'o, e fa'apea o le ta'ua o le tagata o le Kerisiano e tatau lea ona pei o Keriso.

O le olaga o Ioane o se tasi na taumafai ma le naunauta'i e ō gatasi ma le finagalo o le Atua. O le aposetolo sa mulimuli vāvālalata tele ma lona Fa'aola, ma maua ai e ia le lagona o le mamā ma le fa'aeaina o le pa'ia o Keriso, na foliga lana lava amio, pe a fa'atusatusa atu, e matuā ponā lava. Ma ina ua fa'aalia mai Iesu i Lona tino mamalu iā Ioane, sa na o lana tepa e tasi na mafua ai ona pa'ū i lalo e pei o se tasi ua oti. O le lagona lenā a i latou ua iloa lelei lo latou Ali'i ma le Matai. O le tele o le manatunatu loloto i le soifuāga ma le uiga o Keriso, o le tele lea o le loloto o le lagona o ā latou lava agasala, o le itiiti lea o lona manatu o le a fa'aailoa mai o ia e pa'ia lona loto po o le ta'u mitamita mai o latou e fa'apa'iaina.

O le Amio a le Kerisiano

Matā'upu 10

O le uiga moni o le Kerisiano e fa'aalia mai lea i lona olaga o aso faiso'o. Ua fetalai mai Keriso, "E fa'apea fo'i la'au lelei ta'itasi ma fua mai i fua lelei; a o le la'au leaga e fua mai i fua leaga" (Mataio 7:17). Ua fa'atusaina e lo tatou Fa'aola Ia lava i se vine, a o Ōna so'o o lālā ia. Ua Ia fa'ailoa manino mai o i latou uma e fia 'avea ma Ōna so'o e tatau ona fua mai; ma na Ia fa'aalia mai pe fa'apefea ona 'avea ma lālā e fua tele mai. "Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u" (Ioane 15:4).

Ua fa'amatala mai e le aposetolo o Paulo le fua e tatau ona fua mai ai le Kerisiano. Ua fai mai o ia e i "le agalelei uma lava lea, ma le amiotonu, ma le fa'amaoni" (Efeso 5:9). Ua toe fa'apea mai fo'i, "A o le fua o le Agaga o le alofa, o le 'oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā" (Kalatia 5:22, 23). O nei uiga tāua o ni ta'iala o le tulafono a le Atua e tatau ona tau'aveina i le olaga atoa.

O le tulafono a le Atua e pau lea o le tapula'a moni o le amio e lelei le ato'atoa, auā sa tu'uina mai le fa'ata'ita'iga o le tausiga o le tulafono i le soifuāga o Keriso. Na fetalai mai e fa'atatau iā te Ia lava, ua "Ou tausia poloa'iga a Lo'u Tamā" (Ioane 15:10). E leai se tasi usiusita'i e itiiti mai i lo lea e talafeagai ma mana'oga a le afioga a le Atua. "O lē fa'apea o lo'o tumau ia i totonu iā te Ia, e tatau ona savali o lenā tagata fa'apei ona savali o Ia" (I Ioane 2:6). E mana'omia e le Atua lo tatou usiusita'i i Āna afioga; e lē mafai ona tatou 'ai'oi atu e tatou te lē mafai ona faia lea mea, auā ua iā i tatou le mautinoāga, fa'apea, "O Lo'u nei alofa tunoa e lava lea e fesoasoani iā te 'oe" (II Korinito 12:9). A tatou va'ai atu i le fa'ata fa'alelagi, o le tulafono a le Atua, tatou te va'aia ai le matuā leaga tele o le agasala, ma lo tatou lava tulaga lēiloa ona o le solitulafono. Peita'i e ala i le salamō ma le fa'atuatua ua ta'uamiotonu ai i tatou i luma o le Atua, ma e ala i le alofa tunoa o le Atua ua mafai ai ona tatou usiusita'i i Āna poloa'iga.

Alofa mo le Atua ma Tagata

O i latou uma e i ai le alofa moni mo le Atua o le a fa'atinoina se naunauta'i ia iloa ma fai Lona finagalo. Ua fa'apea mai le aposetolo o Ioane i āna tusiga o lo'o fa'amamafaina ai le alofa, "Auā o lenei lava le alofa i le Atua, ia tatou tausia i Āna poloa'iga" (I Ioane 5:3). O le tamaitiiti e alofa i ōna mātua o le a fa'aalia lea alofa e ala i lona usiusita'i; peita'i o le tamaitiiti e manatu fa'apito, e lē loto fa'afetai, e ssa'ili ia faia sina mea itiiti mo mātua, a e o lo'o naunau ia e maua manuia uma e fa'afiafia ai e fa'apei o lē e usiusita'i ma e fa'amaoni. E fa'apea fo'i iā i latou o ē ta'u mai o le fanau a le Atua; le to'atele e iloa e alofa ma tausia i latou e le atua, ma e naunau ia maua Āna fa'amanuiāga, a e latou te lē fiafia e faia Lona finagalo. E latou te ta'u mai o poloa'iga a le Atua e mamafatū, o se noataga e faigatā ma lē lelei. Peita'i o le tagata o lo'o sa'ili ma le fa'amaoni le loto ma le olaga e fa'apa'iaina e fiafia ia i le tulafono a le Atua, ma e fa'anoanoa pe a ia lē 'ausia le tapula'a o lo'o mana'omia.

O lo'o fa'atonuina i tatou ia alofa le tasi i le tasi e pei ona alofa mai Keriso iā ii tatou. Ua fa'atinoina Lona alofa ina ua tu'uina Lona soifua ia laveā'iina ai i tatou. Ua ta'u mai e le so'o ua pele ia tatau fo'i ona naunau o tatou loto e fa'apea ona tu'u atu o tatou ola mo o tatou uso. Auā "o i latou uma fo'i o ē alolofa i lē āna le fanau, e alolofa fo'i i latou i lana fanau" (I Ioane 5:1). Pe afai e tatou te alolofa iā Keriso, e tatau ona tatou alolofa iā i latou e pei o Ia i Lona soifuāga ma Ōna uiga. Ma e lē na o lea, a e ia alolofa i ē e leai "se fa'amoemoe," ma e "aunoa fo'i ma le Atua i le lalolagi" (Efeso 2:12). Na tu'ua e Keriso Lona aiga i le lagi a e afio mai i le lalolagi e fa'apuapuagāiaina ma maliu ai ina ia fa'asaoina tagata agasala. Mo lenei i'uga, na Ia galue ma mafatia ma tatalo

ai, se'ia o'o ina ua loto momoia ma tu'ulafoā'iina e i latou na Ia afio mai e fa'asao. Na Ia tu'uina mai atoa Lona soifua i Kalevario.

Fa'ata'ita'i i le Fa'aa'oa'oga

E to'atele e lē 'auai i se olaga e pei ona soifua ai le Fa'aola. E manatu i latou o se taulaga ofo lea e matuā telē o le a mana'omia e faia ina ia tusai ma le Fa'ata'ita'iga, ia maua mai ai fua o galuega lelei, ma lava ai le onosa'i a o teuteuina e le Atua ina ia aumai ai nisi fua e tele. Peita'i pe a fa'apea ifo le Kerisiano o ia e na o se mea faigaluega maulalo i 'a'ao o Keriso, ma taumafai e fai ma le fa'amaoni galuega uma ma fa'alagolago i le fesoasoani ua folafola mai e le Atua, o le a ia amoina loa le amo faigofie a Keriso; o le a ia tau'aveina 'avega mo Keriso, ma ta'u mai e māmā lava. E mafai ona tepa a'e ia i luga ma le lototele ma talitonu fa'amaoni, ma fa'apea mai, "Ua 'ou iloa o Ia ua 'ou fa'atuatua i ai, ma a'u mautinoa ua mafaia lava e Ia ona leoleo i le mea na 'ou tu'uina atu ai iā te Ia e o'o atu i lea lava aso" (II Timoteo 1:12).

Pe afai tatou te fetaia'i ma fa'afitāuli i o tatou ala, ma tatou manumalō ai; pe a tatou fa'afesaga'i ma ē tete'e ma faitio mai, ma manumalō ona o le suafa o Keriso; pe a tatou tau'ave o tatou tiute ma fai a tatou galuega e tatau ai i le agaga o lo tatou Matai - ona tatou maua lea o se malamalamaga tāua o Lona fa'amaoni ma Lona mana. O le a tatou lē toe fa'alagolago i galuega a isi, ona ua tatou molimauina i tatou lava ia. E pei o tagata Samaria anamua, e mafai ona tatou fa'apea atu, "O i matou lava ua matou fa'alogologo, ua matou iloa fo'i, e moni lava, o le Fa'aola lenei o le lalolagi, o le Keriso lava" (Ioane 4:42).

Pe a tatou manatunatu loloto i le uiga o Keriso, ma tatou iloa Lona mana fa'asao, o le a tatou iloa manino ai lo tatou vaivai ma le lē atoa'atoa, ma o le a tatou tepa ma le fa'amaoni iā te Ia, o lo tatou malosi ma lo taou Fa'aola. E leai lava so tatou malosi e fa'amamā ai le malumalu o le agaga mai mea o lo'o leaga ai; peita'i pe afai tatou te salamō mai agasala na tatou fai e tete'e ai i le Atua, ma sa'ili le fa'amagaloga e ala iā Keriso, o le a Ia aumai le fa'atuatua e galue ona o le alofa ma e fa'amamāina ai le loto. E ala i le fa'atuatua iā Keriso ma le usiusita'i i le tulafono a le Atua o le a mafai ai ona fa'apa'iaina i tatou, ma o le a mafai ona maua le malosi e talafeagai ma i latou i le fa'apotopotoga a agelu pa'ia ma ē ua togiolaina i le malō mamalu.

So'otaga ma Keriso o la Tatou Avanoa Fa'apitoa

E lē na o le avanoa a e o le tiute fo'i a Kerisiano uma ia tausi lelei le so'otaga ma Keriso ma ia lelei le galuea'iina o mea a le Atua. O le a maua ai lea i lona olaga o ni fua mai galuega lelei. Na fetalai Keriso, "E vi'ia Lo'u Tamā i lenei mea, pe a outou fua tele mai" (Ioane 15:8). Pe a tatou faitau i olaga o ē tulaga maualuluga ona o lo latou amiotonu, tatou te fa'atatau e lē mafai ona tatou 'ausia le tapula'a o a latou galuega. Peita'i e lē tonu lea manatu, auā na maliu Keriso mo tagata uma. Ua Ia ta'utino mai i Lana afioga e matuā finagalo Ia e tu'u mai Lona Agaga Pa'ia iā i latou uma o ē ōle atu iā te Ia, e sili mamao atu i lo o meaalofa e tu'uina e mātua i a latou fanau. E le'i fa'aleleiina amio Kerisiano a perofeta ma aposetolo ona o se vavega. Sa latou fa'aaogā mea na tu'u i ai e le Atua; ma o i latou uma e fa'apea ona taumafai, o le a latou maua fo'i lea lava i'uga.

O le Tatalo a Paulo mo le Ekalesia

I lana tusi i le ekalesia i Efeso, na fa'atū atu ai e Paulo i o latou luma le "'upu o le tala lelei sa lilo" (Efeso 6:19), le "'oloa faula'i o Keriso e lē masu'esu'eina lava" (Efeso 3:8), ma na ia ta'utino atu āna tatalo fa'atauānu mo lo latou manuia fa'aleagaga:

"O le mea lea 'ou te to'otuli ai i le Tamā o lo tatou Ali'i o Iesu Keriso,...ina ia foa'iina iā te outou e tusa ma le faula'i o Lona vi'iga, ia fa'amalosia outou i le mana e Lona lava Agaga, i le tagata i totonu; ia nofo mau Keriso i o outou loto i le fa'atuatua, ina ia mauā'a outou, ma ia fa'avaeina i le alofa, tou te mafai ai ona iloa lelei e outou atoa ma le 'au pa'ia uma, o le uiga o le lautele, ma le umi, ma le loloto, ma le maualuga, ia iloa fo'i le alofa o Keriso ua silisili 'ese e lē maileā, ia fa'atutumuina outou i le tumu uma lava o le Atua" (Efeso 3:14-19).

Sa ia tusi atu fo'i i ōna uso i Korinito, "o ē ua fa'apa'iaina iā Keriso Iesu...: Ia iā te outou le alofa tunoa ma le manuia mai le Atua lo tatou Tamā, ma le Ali'i o Iesu Keriso. 'Ou te fa'afetai atu i lo'u Atua e lē aunoa ona o outou, auā o le alofa tunoa o le Atua ua foa'iina mai iā te outou iā Keriso Iesu; ina ua fa'atamāo'aigaina outou e Ia i mea uma, i le 'upu uma lava ma le poto uma; fa'apei ona fa'amaonia le molimau iā Keriso iā te outou; o lea ua outou lē matitiva ai i se mea alofa e tasi; o lo'o fa'atalitali outou i le fa'aaliga o lo tatou Ali'i o Iesu Keriso" (I Korinito 1:2-7). O nei 'upu e lē mo na o i latou i Korinito, a e fa'apea tagata uma o le Atua e o'o i le taimi fa'ai'u. Ia tatau i Kerisiano uma ona maua le fa'amanuiāga o le fa'apa'iaina.

Sa fa'aauau le aposetolo i nei 'upu, "Le 'au uso e, 'ou te 'ai'oi atu iā te outou i le suafa o lo tatou Ali'i o Iesu Keriso, ina ia tasi la outou 'upu uma lava, ina ne'i i ai ni maseiga iā te outou; a ia maopoopo lava i le loto e tasi ma le manatu e tasi" (F. 10). E lē 'ai'oi atu Paulo iā i latou ina ia fai se mea e lē mafai ona faia. O le nofolelei fa'atasi o le i'uga moni lea o le atoāga fa'a-Kerisiano.

I le tusi i le 'au uso i Kolose, ua fa'aali mai ai avanoa matagofie o lo'o teuina mo le fanau a le Atua. "Talu ona ma fa'alologologo i lo outou fa'atuatua iā Keriso Iesu, ma lo outou alofa i le 'au pa'ia uma lava;...O le mea lea o i maua fo'i ma te le'i mapu ai lava i le tatalo mo outou, talu le aso na ma fa'alologologo ai, ma te 'ai'oi atu fo'i ina ia ato'atoa ona outou iloa lelei o Lona finagalo, i le poto uma atoa ma le mafaufau fa'aleagaga; ia outou savavali e tusa ma le Ali'i, ina ia fiafia mai o Ia iā te outou i mea uma, ma ia outou fua mai galuega lelei uma lava, ma ia tupu pea lo outou iloa lelei o le Atua; ia fa'amalosia outou i le malosi uma lava, e tusa ma Lona malosi ua silisili, e i'u i le onosa'i uma lava ma le fa'atoatoa atoa ma le fiafia" (Kolose 1:4-11).

Tapula'a o le Fa'apa'iaina

Na taumafai fo'i le aposetolo ina ia 'ausia e ia lea lava tapula'a maualuga e pei ona ia tu'uina i luma o ōna uso. Ua tusi atu i uso o i Filipi, "O mea uma sa aogā iā te a'u, ua 'ou manatu ua lē aogā ia mea ona o Keriso. O lenei fo'i e moni lava, o lo'u manatu ua lē aogā mea uma lava ona o le silisili 'ese o le poto i la Keriso Iesu lo'u Ali'i;...ina ia 'ou iloa o Ia, ma le mana o Lona toe tū mai, ma ia fa'atasi a'u i Ōna tigā, ona ua fa'atusaina a'u iā te a'u i Lona maliu, pe mafai lava iā te a'u ona o'o atu i le toe tū mai o ē ua oti. E lē peisea'i ua 'ou maua nei, po ua 'ou ato'atoa ona lelei nei; a 'ou te tausisi atu pea pe mafai ona 'ou maua o le mea na maua ai a'u e Keriso Iesu. Le 'au uso e, 'ou te lē manatu ua 'ou maua, a o le mea e tasi 'ou te faia, 'ou te fa'alogalo i mea ua tuana'i, 'ou te momo'e punou a'i fo'i i mea o lumana'i, 'ou te tausisi atu i le fa'ailoga, ia maua ai le tau'i na vala'auina ai a'u mai lugā e le Atua iā Keriso Iesu" (Filipi 3:7-14). E matuā i ai le 'ese'esega i le vā o le mitamitavale ma le fa'afiaamiotonu o i latou o ē ta'u mai e leai ni a latou agasala ma le gagana mai le loto fa'amaulalo a le aposetolo. A e o lona olaga mamā ma le fa'amaoni na fa'ailoa ai le malosi o āna fautuāga i ōna uso fa'aleagaga.

O le Finagalo o le Atua

E le'i fa'atuai ona fa'amalosia e Paulo, i taimi uma e tatau ai le tāua o le fa'apa'iaina fa'ale-Tusi Pa'ia. Ua fa'apea mai ia, "Ua outou iloa ia poloa'iga na matou tu'uina atu ai iā te outou mai le Ali'i o Iesu. O le finagalo fo'i lenei o le Atua, ia fa'apa'iaina outou" (I Tesalonia 4:2, 3). Ma "O lenei, a'u pele e, fa'apei ona outou 'ana'ana mai e lē aunoa, e lē gata ina o tatou nonofo ma outou, a o lenei ua atili ai ina ua 'ou lē i ai iā te outou, ia outou galulue a'ia'i ma le mata'u atoa ma le gatete, ina ia fa'aolaina outou. Auā o le Atua, o Ia lē galue i totonu iā te outou i Lona finagalo alofa, ina ia outou loto ma galulue i ai. Ia outou faia mea uma lava ma le lē muimui, ma le lē fefinaua'i; ina ia 'avea outou ma ē ua lē mata'uleagaina, ma ē ua sao le amio, o le fanau a le Atua, e lē ponā i luma o le tupulaga amio fa'api'opi'o ma le finau vale; ua pupula iā te i latou la outou amio, fa'apei o mea e fa'amalamalama a'i le lalolagi" (Filipi 2:12-15).

Na ia poloa'i Tito ina ia fa'atonu le ekalesia e tatau ona talitonu o le fa'aolataga e maua ona o le lelei o Keriso, ma e ala i le alofa tunoa o le Atua e mafuta i o latou loto, o le a ta'ita'iina ai i latou e galulue ma le fa'amaoni e faia tiute uma o le olaga. "Ia e fa'amanatu atu iā i latou ia latou usiusita'i i ali'i sili ma faipule, ia gaua'i i ali'i, ia nofo sauniuni fo'i i latou i galuega lelei uma lava, 'aia ne'i 'upu leaga i se tasi, 'aia ne'i fa'amisa, a ia fa'apalepale, ma ia fa'aali atu le agamalū uma i tagata uma lava....A ua fa'aalia mai le agalelei ma le alofa i

tagata o lo tatou Fa'aola le Atua, ona fa'aola mai ai lea o Ia iā i tatou, e lē ona o galuega o i le amiotonu sa tatou faia, a e tusa ma Lona lava alofa i le fa'ata'eleina i le toefuata'iina ma le fa'afouina e le Agaga Pa'ia, ua na fa'amaligi tele mai i luga iā i tatou, ona o Iesu Keriso lo tatou Fa'aola; ina ia ta'uamiotonuina i tatou i Lona lava alofa tunoa, ia fai i tatou ma sulī e tusa ma le fa'amoemoe i le ola e fa'avavau. O le 'upu moni lenā 'ou te loto fo'i ina ia e matuā fa'amalosi atu i ia mea, ina ia naunau i latou o ē ua fa'atuatua i le Atua ona ia faia galuega lelei; e lelei lava ia mea ma aogā i tagata" (Tito 3:1-8).

Ua sa'ili Paulo e fa'amauiina i o tatou mafaufau le 'upu moni e fa'atatau i le alofa, o le fa'avae o 'au'aunaga uma e faia i le Atua, a e o le paleali'i lava lea o galuega lelei uma a le Kerisiano; ma e na o le agaga e fa'aalitino ai le alofa o le a nofomau ai le filemū a le Atua. "O lenei, ia 'o'ofu outou i le alofa mutimuti vale, ma le agalelei, ma le loto maulalo, ma le agamalū, ma le onosa'i, fa'apei o ē ua filifilia e le Atua, o ē ua pa'ia ma ua alofaina; ia fefa'apalepalea'i, ma ia fefa'amagaloa'i outou, pe afai ua agaleagaina se tasi e se tasi; fa'apei ona fa'amagalo mai Keriso iā te outou, ia fa'apea fo'i outou. A o le alofa, e lautua lea i nei mea uma, o le fusi lea e ato'atoa ona lelei ai. Ia pule fo'i le filemū mai le Atua i o outou loto, o le mea lea ua vala'auina ai outou e fai ma tino e tasi; ma ia outou saga fa'afetai. Ia nofo le afioga a Keriso i totonu iā te outou ia tele lava, i le poto uma lava, ia outou a'oa'o ma apoapoai le tasi i le tasi i salāmo, ma pese, ma siva fa'aleagaga, o lo'o pepese atu ai ma le fa'afetai i le Ali'i i o outou loto. O mea uma fo'i tou te faia i le tautalatala, po o le amio, ia faia uma lava ia mea i le suafa o le Ali'i o Iesu, ma le fa'afetai i le Atua le Tamā ona o Ia" (Kolose 3:12-17).

O le Fa'apa'iāga - Avanoa Fa'apitoa a le Kerisiano

Matā'upu 11

E to'atele i latou o lo'o taumafai e sa'ili ma le fa'amaoni se loto e fa'apa'iaina ma ola i se olaga mamā a e foliga mai ua na o le lē mautonu ma le fa'avaivai. Ua na o le va'ai vale iā i latou ma faitio ona ua leai so latou fa'atuatua; ona ua aunoa ma se fa'atuatua ua latou lagona ai e lē mafai e latou ona maua fa'amanuiāga a le Atua. Ua manatu sesē latou fa'apea o le lagona o le fa'atuatua lava lea. Ua latou va'ai i talatu o le faigofie o le fa'atuatua moni, ma ua matuā fa'apogisāina ai o latou agaga. E tatau iā i latou ona liliu'ese le mafaufau mai iā i latou lava, a ia fa'atumaui atu i le alofa tunoa ma le agalelei o le Atua ma manatunatu i Āna folafolaga, ona tau lea ina talitonu o le a Ia fa'ataunu'uina Āna afioga. Ia tatou lē talitonu i lo tatou lava fa'atuatuāga, peita'i ia talitonu i folafolaga a le Atua. Pe afai tatou te salamō ona o tatou solitulafono ua mavae, ma tausisi ia fai meatonu i le lumana'i, e tatau loa ona tatou talitonu e talia tatou e le Atua ona o le suafa o Keriso, ma o le a Ia fa'amagalo i a tatou agasala.

E i ai taimi o le a o'o mai ai le pogisā ma tau fa'avaivai ai le agaga, ma e tau fa'afefe mai ia fa'ato'ilalo ai tatou, peita'i e lē tatau ona tatou tu'u'ese lo tatou talitonuga. Ia tumau la tatou va'ai iā Iesu, pe mana'o i ai pe leai. E tatau ona sa'ili ia faia ma le fa'amaoni o tatou tiute uma, ma o le a mafai ai ona tatou maua se malōlōga filemū i folafolaga a le Atua.

O le Olaga o le Fa'atuatua

E i ai taimi e tatou te lagona ai lo tatou tulaga lē aogā ma o le a oso a'e ai le mata'u i o tatou loto; peita'i e lē o se fa'amaoniga lenei ua suia le finagalo alofa o le Atua mo i tatou, pe o tatou mo Ia. Atonu o le asō ua tatou lē lagona ai se fiafia ma se filemū e pei ona i ai i le aso ananafi; peita'i e tatau ona tatou 'a'apa atu pea i le 'a'ao o Keriso ma le fa'atuatua, ma ia talitonu ato'atoa iā te Ia i le taimi pogisā e pei fo'i ona i ai i le malamalama.

Atonu o le a musumusu atu Satani, "O 'oe o se tagata e agasala tele ua lē mafai e Keriso ona lavea'i." A o e fa'ailoa atu lou tulaga agasala ma le lē aogā, atonu o le a e fa'afetaui lē e fa'aosooso mai ma le 'alaga, "E ala i le mana o le togioa, 'ou te 'avea Keriso ma o'u Fa'aola. 'Ou te lē tausisi i lo'u lava lelei, a e o le toto tāua o Iesu, lea e fa'amamāina ai a'u. I lenei lava taimi o lo'o taofimau lo'u agaga vaivai e 'a'ao o Keriso." E tatau ona fa'atumaui pea le fa'atuatua ola i le olaga o le Kerisiano. O le fa'atuatua e lē vave mavae, o le fa'alagolago e mausalī i luga o Keriso, o le a aumaia le filemū e mautinoa i le agaga.

Tete'e Atu i Fa'aosoosoga

'Aua ne'i fa'avaivai ina ua foliga mai ua fa'ama'a'aina lou loto. O fa'afitāuli uma, o fili uma mai totonu, o le a fa'atele ai ona e mana'omia o Keriso. Na afio mai o Ia e 'ave'ese le loto ma'a'a, a e tu'u iā te 'oe le loto 'a'ano (Esekielu 11:19). Va'ai iā te Ia mo le alofa e fa'apitoa ina ia fa'ato'ilalo ai ōu uiga sesē. Pe a osofa'ia e fa'aosoosoga, ia tumau le tete'e atu i taumafaiga leaga; ma ia fai atu i lou agaga, "E fa'apefea ona 'ou lē fa'amamaluina lo'u Fa'aola? Ua 'ou tu'u atu a'u iā Keriso; e lē mafai ona 'ou faia galuega a Satani." Ia tagi atu i le Fa'aola mo le fesoasoani e 'ave'ese atu tupua uma ma agasala uma sa pele iā te 'oe. Ia va'ai atu, e ala i mata o le fa'atuatua, iā Iesu o lo'o tula'i i luma o le nofoāli'i o le Tamā, ma tu'u atu Ōna 'a'ao manu'a a o Ia fa'atoga atu mo 'oe. Ia talitonu o le malosi e aumai iā te 'oe e ala lea mai lou Fa'aola pele.

Va'ai Atu ma Mata o le Fa'atuatua

Se'i va'ai e ala i le fa'atuatua i paleali'i o lo'o teuina mo i latou o ē o le a manumalō; fa'alogo i le pese fiasia a le 'au fa'aolaina, Ua tatau lava le Tama'i Mamoe na fasia ma na togiolaina tatou i le Atua! (Fa'aaliga 5:12). Taumafai ia e iloa manino e moni nei va'aiga. I lana fete'ena'iga mata'utia ma ta'ita'i ma pule ma le matuā amioleaga fa'aleagaga o ē tulaga maualuga, na fa'apea atu ai Setefano, le ulua'i Kerisiano na fasiotia, "Fa'auta, ua 'ou iloa le lagi ua avanoa, ma le Atali'i o le tagata o lo'o tū i le itū taumatau o le Atua" (Galuega 7:56). Sa fa'aalia iā te ia le Fa'aola o le lalolagi, o lo'o silasila ifo mai le lagi ma Lona loto naunau, ma le malamalama matagofie mai fofoga o Keriso o lo'o fa'asusuluina i luga o Setefano ma se pupula e o'o lava i ōna fili sa latou va'aia ōna foliga o lo'o susulu mai pei o foliga o se agelu.

Pe afai e tatou te fa'ataga o tatou mafaufau e tumau iā Keriso ma le lagi, ona mafai lea ona tatou maua se fa'amalosi'aga ma se lagolago e tau ai taua mo le Ali'i. O le mitamitavale ma le fiasia i le lalolagi o le a fa'aitiitia ai le malosi a o tatou mafaufau loloto i manuia o le nu'u e sili atu, ua lata ona fai ma o tatou aiga. A e lē gata i le matagofie o Keriso, o mea fa'afiafia uma fa'alelalolagi o le a leai se aogā.

Pe a e lē taumafai ma le fa'amaoni e faia lau vaega, 'aua ne'i manatu se tasi o le a mautinoa ona maua le alofa o le Atua. Pe afai ua leva ona teu i o tatou loto mea fa'alelalolagi, o le a faigatā ona sui o manatunatuga ua masani ai. O le mea e va'ai i ai mata ma fa'alogo i ai taliga o le a tosina malosi i ai le loto ma le mafaufau. Peita'i pe afai e tatou te ūlu atu i le 'a'ai o le Atua ma tepa iā Iesu ma Lona mamalu, o le a mafai ona va'aia ai o Ia e ala i mata o le fa'atuatua. E tatau ona 'avea afioga ma le uiga o Keriso e fai ma autū o tatou manatunatuga ma tatou talanoāga, ma ia tatau i aso ta'itasi ona fa'aavanoa le taimi fa'apitoa mo le tatalo ma le su'esu'e loloto i nei matā'upu pa'ia.

Fa'afilemūina le Agaga

O le fa'apa'iāga o se galuega e faia i aso ta'itasi. Ia lē fa'asesēina se tasi i le fa'apea o le a fa'amagalo ma fa'amanuiaina e le Atua i tatou a o tatou solipala se tasi o Āna fa'atonuga. O le agasala e faia ma le iloa o le a fa'afilemū ai le si'ufofoga molimau a le Agaga Pa'ia ma vavae'ese ai le tagata mai le Atua. Pe o le ā lava le fiasia e lagona ona o le talitonuga o i le tagata, e lē mafai ona afio Iesu i le loto e lē amana'ia le tulafono a le Atua. E ta'uleleia e le Atua na o i latou o ē fa'amamaluina o Ia.

"O āna 'au'auna outou tou te 'ana'ana i ai" (Roma 6:16). Pe afai e tatou te fa'amalieina le loto ita, tu'inaanau, o le mana'ofua, 'ino'ino, manatu fa'apito, po o se isi lava agasala, ua 'avea loa tatou ma 'au'auna a le agasala. "E leai se na te mafaia ona 'au'auna i ali'i e to'alua" (Mataio 6:24). Afai tatou te 'au'auna i le agasala, e lē mafai ona tatou 'au'auna iā Keriso. O le a lagona e le Kerisiano 'u'una'iga a le agasala ona o le tu'inaanau o le tino e tete'e i le Agaga; peita'i o le Agaga o le a galue e tete'e pea le tino, ma o le a fa'aauau pea lea taua. O i inei e mana'omia ai le fesoasoani a Keriso. O le vaivaiga fa'aletagata o le a soso'ofa'atasi ma le malosi fa'alelagi, ma fa'apea mai le fa'atuatua, "E fa'afetai i le Atua, o Lē na te foai'ina mai le manumalō iā te i tatou talu lo tatou Ali'i o Iesu Keriso" (I Korinito 15:57).

Masaniga Tonu Fa'ale-Agaga

Pe afai e tatou te atina'e ma fa'atupu se amio e mafai ona talia e le Atua, e tatau ona fausia i o tatou ola fa'aleagaga masaniga e tonu ma lelei. E tatau mo le tuputupu a'e i le alofa tunoa ona tatalo i aso ta'itasi, a e fa'apea fo'i mo le olaga fa'aleagaga, e pei o le mana'omia o le mea'ai mo le soifua malōlōina. O le mea lea e tatau ai ona tatou fa'amasani e si'itia a'e i le Atua i le tatalo manatunatuga i taimi uma. E tatau ona tatou taumafai e fa'amasani le mafaufau o lo'o feliuliua'i solo ina ia tumau iā Keriso. E lē mafai ona tatou saogalemū pe afai e tatou te vavae'ese mai iā Keriso. Atonu o lo'o fa'atasi pea Ia ma i tatou i la'asaga uma, a e ia tatou iloa ma usiusita'i i tulaga ua Ia tu'u mai.

E tatau ona faia le fa'atuatuāga ma matā'upu tāua o le olaga. O isi mea uma e tatau ona tu'u i lalo ifo o lea mea. O o tatou malosi uma, o le loto, tino, ma le agaga, e tatau ona fa'aaogāina i le taua a le Kerisiano. E tatau iā i tatou ona tepa iā Keriso mo le malosi ma le alofa tunoa, ma o le a mautinoa e tatou te maua le manumalō e pei ona maliu Iesu mo i tatou.

O le Aogā o le Agaga

E tatau ona tatou ō fa'alatalata atu i le satauro o Keriso. O le ulua'i lesonea e tatau ona a'oa'oina ai tatou o le salamō lea i lalo o le satauro. O ai e mafai ona malamalama i le uiga o le alofa o Iesu? O le alofa e aupito sili atu le fa'apalepale ma le lē fa'apito i lo o le alofa o le tinā! Pe ana mafai ona tatou iloa le tāua o le agaga o le tagata, e tatau ona tatou va'āi ma le fa'atuatua ola i luga o le satauro, ona amataina lea o le su'esu'ega o le a 'avea ma matā'upu ma le pese a le 'au fa'aolaina e o'o i le fa'avavau. O le aogā o la tatou taimi ma taleni e fa'atatau lea i le tele o le tau sa totogiina e togiola ai tatou. O lo tatou uiga lē fa'afetai e fa'atinoina aga'i i le Atua pe a tatou gaoi mai iā te Ia e ala i le 'ave'esea o le alofa mo Ia ma taofia la tatou 'au'aunaga. O se mea ea e tautele le tu'u atu o tatou iā te Ia, Lē na tu'u mai fa'ataulaga mea uma mo i tatou? E mafai ea ona tatou filifili e fa'auō i le lalolagi a e lē o le mamalu e lē mavae, o lo'o ofo mai e Keriso - e "Ma te nonofo fa'atasi ma A'u i Lo'u nofoāli'i, e pei o A'u fo'i ona 'Ou manumalō, ua ma nonofo fo'i fa'atasi ma Lo'u Tamā i Lona nofoāli'i" (Fa'aaliga 3:21)?

O se Galuega e Aga'i Pea i Luma

O le fa'apa'iaina o se galuega e alu aga'i pea i luma. O la'asaga ta'itasi ua tu'u mai iā i tatou i 'upu a Peteru, "O le mea lava lea ia outou matuā fa'amalosi ai lava, ina ia fa'aopoopoina le amio lelei i lo outou fa'atuatua, ia fa'aopoopo fo'i le poto i le amio lelei, ia fa'aopoopo fo'i le lē gaoiā i le poto, ma ia fa'aopoopo le onosa'i i le lē gaoiā, o le amio Atua fo'i i le onosa'i, ia fa'aopoopo fo'i le alofa i le 'au uso i le amio Atua, o le alofa fo'i i le alofa i le 'au uso. Auā pe a maua e outou ia mea, ma ua fa'ateleina, ona 'avea ai lea o outou ma ē ua lē paiē, a o ē fua mai le iloa lelei o lo tatou Ali'i o Iesu Keriso" (II Peteru 1:5-8). O le auala lenei e mafai ai ona tatou mautinoa o le a lē mafai ona tatou pa'ū'ū. "O lenei, le 'au uso e, ia atili ai ona fa'amalolosi outou ia fa'amauiina lo outou vala'auina ma lo outou filifilia, auā pe a outou faia ia mea tou te lē i'u vale lava. Auā a fa'apea, ona matuā fa'aofia ai lea o outou i le ala o le malō e fa'avavau o lo tatou Ali'i o lo tatou Fa'aola lea o Iesu Keriso" (F. 10, 11).

O i latou o lo'o galulue fa'apea i le fuafuāga mo le fa'aopoopoina o manuia fa'a-Kerisiano, ua mautinoa o le a galue le Atua i le fuafuāga e fa'atele ona fa'aopoopo iā i latou meaalofa o Lona Agaga Pa'ia. Sa tautala Peteru iā i latou o ē na maua lea fa'atuatua tāua: "Ia fa'ateleina iā te outou le alofa tunoa ma le manuia i lo outou iloa lelei le Atua, atoa ma lo tatou Ali'i o Iesu" (F. 2). E ala i le alofa tunoa o le Atua, o i latou uma e loto i ai o le a a'ea le auala pupula mai le lalolagi e o'o i le lagi, e mulimuli ane, "ma le 'alaga ma le 'oli'oli e fa'avavau" (Isaia 35:10), o le a latou ūlu atu i faitoto'a o le 'a'ai o le Atua.

E mana'omia e lo tatou Fa'aola mea uma o lo'o iā i tatou; o tatou ulua'i manatunatuga ma e pito sili le pa'ia, o tatou fa'ane'ene'ega e sili ona mamā ma le alofa e matuā malosi lava. Pe afai e mautinoa ua tofusua i tatou i le uiga fa'ale-Atua, o le a i ai pea Ōna vi'iga i totonu o tatou loto ma i o tatou laugutu. E tasi le mea o le a tatou saogalemū ai o le tu'u atu atoa o i tatou iā te Ia ma ia tuputupu a'e pea i le alofa tunoa ma ia iloa le 'upu moni.

O le 'Alaga o le Manumalō a Paulo

Na fa'amamaluina e le Atua le aposetolo o Paulo, ina ua 'avea ia e ala i le fa'aaliga pa'ia i le lagi sautolu, i le mea na ia va'ai ai i va'aiga mamalu e le'i fa'atagaina ia e mafai ona fa'ailoa atu. A e le'i 'avea lea ma mea na fia fa'avi'ivi'i pe fa'alialiavale ai. Na ia iloa le tāua o le mataāla ma le fa'afitia pea o ia lava, ma na fa'apea atu, "A 'ou te fa'atō'ilaloina lo'u nei tino, ma a'u fai ai ma pologa, ina ne'i i'u ina lē fa'amaoni a'u, o a'u sa tala'i atu i isi tagata" (I Korinito 9:27).

Na fa'apuapugātiaina Paulo ona o le 'upu moni, a e tatou te lē o fa'alogo i ni faitiōga mai ōna laugutu. A o ia iloilo lona olaga galue ma le agaalofo ma le osi fa'ataulaga, ua fa'apea mai ai ia, "O lo'u manatu e lē tatau ona fa'atusaina le tigā i nei ona pō ma le manuia atālī e fa'aalia mai iā te i tatou" (Roma 8:18). Ua o'o mai lava i lo tatou taimi le 'alaga manumalō mai le 'au'auna fa'amaoni a le Atua: "O ai sē na te fa'ate'a'eseina mai i

tatou i le alofa o Keriso? o le puapuagā ea, po o le atuatuva'e, po o le sauā, po o le oge, po o le lavalavā, po o le pagatia, po o le pelu? ... A ua tatou manumalo a'ia'i i nei mea uma lava, ona o Ia ua alofa mai iā te i tatou. Auā ua 'ou mautinoa, e le mafaia e le oti, po o le ola, po o le agelu, po o ali'i, po o ē malolosi, po o mea i nei ona pō, po o mea atali, po o le maua'uga, po o le loloto, po o se tasi mea na faia, e le mafaia e ia mea ona fa'ate'a'eseina mai i tatou i le alofa o le Atua, o lo'o iā Keriso Iesu lo tatou Ali'i" (Roma 8:35-39).

E ui ina sa tu'uina Paulo i le falepuipui i Roma - tu'u'ese ma le malamalama o le lagi, vavae'ese mai lana galuega mo le tala lelei, ma sa ta'usala'ina mo lenei taimi ina ia oti ai - peita'i na te le'i gaua'i atu ia masalosalo vale pe na leai sona fa'amoemoe. Na sau lana molimau mai lea falepuipui pogisā, e tumu i le fa'atuatua ma le lototele ma se fa'amalosia'aga i loto o le 'au pa'ia ma ē sauāina i augātupulaga uma. O āna 'upu iā Timoteo o lo'o fa'amatala au'ili'ili mai ai i'uga o lea olaga ua fa'apa'iaina: "Auā o a'u ua fa'amaligiina nei lo'u toto, ua lata ōna pō 'ou te alu ai. Ua 'ou tau le taua lelei, ua i'u iā te a'u le tausiniōga, ua 'ou taofi i le 'upu o le fa'atuatua. O lenei, ua teuina mo a'u le pale o le amiotonu, e foa'iina mai iā te a'u i lea lava aso o le Ali'i le fa'amasino amiotonu; e le gata fo'i iā te a'u, a o i latou uma lava o ē fiafia i Lona fa'aali mai" (II Timoteo 4:6-8).

